

求闕齊弟子記

求闕齋弟子記卷八

東湖王定安譔

平寇五

同治二年正月鮑超援涇縣會易開俊擊賊大破之初僞匡王
賴文鴻僞奉王古隆賢僞襄王劉官方擁衆六七萬竄踞大坑
黃村進逼涇縣初四日賊架梯蒙絮悉銳撲城易開俊吳廷華
率勇登陴以木石下擊賊始歛退時鮑超在高祖山疾馳九十
里初五日入涇縣城初六日超遣王衍慶等蹴過山麓分匿叢
箐深樹間而以易開俊等爲之助復令婁雲慶等依山而上譚
勝達等循河而上超親率梁美材等直前挑戰賊從山梁撲下

婁雲慶等正當其衝梁美材等馬步競進戰逾兩時羅天順陣亡超令軍士佯退誘賊近山麓伏兵頓發婁雲慶等回輒轉鬪面面夾擊賊乃大敗正欲歸營瞥見壘中火起已爲譚勝達等所破我軍乘勝併進盡掃羣壘追至黃村大坑又平十數壘涇縣之圍乃解初七日超自涇縣回軍適西河之賊撲近寒亭高祖山老營將圖乘虛一逞南望旗幟蔽空相顧錯愕曰鮑超至矣一聞而散先是公搜獲僞文內稱僞忠王李秀成調集羣賊圍攻常熟擬率二十萬衆再犯江北下援揚州上窺皖楚等語

朝旨飭公先事籌備並飭李鴻章進取太倉援應常昭俾賊回

顧蘇常巢穴不暇徑趨江北時李鴻章遣諜密書諭常熟死守而檄潘鼎新劉銘傳張樹珊以三千人乘輪船赴福山張樹珊營蘆浦港西劉銘傳營其南跨海塘爲壘潘鼎新由同觀山繼進未就而賊至銘傳樹珊擊卻之 十一日蔣益澧克湯溪縣益澧之圍湯溪也射書城中曉以禍福僞朝將彭禹蘭詣益澧乞降益澧令劉樹元至城邊與之約誘出僞忠裨天將李尙揚僞瀛天義張公慶僞喻天義劉明榮僞慈天義李加斌至壕邊劉樹元等出其不意擒解回營益澧見巨款就縛比夜飛飭各營分攻城壘自率親兵於西門策應康國器率閩軍攻南門降人彭禹蘭疾啟西門徐文秀匹馬衝入諸軍繼進併力勇戰斃

賊三千餘名羣賊奪門出走康國器邀擊於南門又斃賊四千餘名城中之賊遂盡僞戴王黃呈忠僞首王范汝增僞梯王練業坤由白龍橋竄金華府 十二日左宗棠軍連克龍游蘭谿兩縣遂克金華府宗棠旣克湯溪復射示龍游城中諭以湯溪已克李尙揚已擒之故賊乘月色晶徹啟東門向湯溪竄金華宗棠遣劉培元等分路截擊率師入城僞壘天燕欵營乞降劉培元楊昌濬等向遂昌一路搜剿賊且拒且走追至湯溪蔣益澧康國器復邀擊破之時蘭溪之賊聞湯溪已破分兩路逃走劉典入收其城白龍橋踞賊黃呈忠亦震怖他竄於是金華賊酋劉政宏勢益孤乃率黨由東門而遁高連陞熊建益乘勢奪

門而入殺賊二千名 十三日左宗棠軍收復武義永康東陽
義烏等縣 十八日左宗棠軍收復浦江縣 二十三日左宗
棠軍收復諸暨縣 二十六日張景渠會洋兵克紹興府楊政
謨克桐廬縣於是浙東肅清左宗棠遣蔣益澧李所部規取杭
州劉典由浦江回嚴州以向皖南江浙軍事駸駸有起色矣
二十八日公自安慶東下視師二十九日抵池州府 是月
陝西軍收復興安府僞扶王陳得才竄紫陽縣 二月初一日
賊犯金柱關水陸官軍擊卻之 劉松山敗賊於甯國府 初
二日鮑超大捷於甯國盡平城外賊壘初三日公至蕪湖初四
日至裕溪口侍郎彭玉麟來會遂由東西梁山駛赴金柱關初

五日抵烏江水營與提督楊岳斌同至金陵之大勝關初六日
入雨花臺營初七日偕弟國荃周察營壘十五日由大勝關赴
九洲洲十六日回舟西上十八日入金柱關小河查閱龍山橋
三汊河查家灣等處十九至二十二等日由東西梁山入裕溪
口小河查閱雍家鎮運漕鎮石澗埠無爲州等處二十三日由
神塘河出口二十七日次大通二十八日回至安慶疏稱臣巡
閱諸軍詳觀賊勢攬南北之形勝察天人之徵應竊以爲有可
懼者數端而可喜者亦有數端自池州以下兩岸難民皆避居
江心洲渚之上編葦葺茅棚高三尺壯者被擄老幼相攜草根
掘盡則食其所親之肉風雨悲啼死亡枕籍臣舟過西梁山等

處難民數萬環跪求食臣亦無以應之二月十五日大勝關江
濱失火茅棚數千頃刻灰燼哭聲震野苦求賑卹他處蘆棚叢
雜亦往往一炬萬命徹池甯國等屬黃茅白骨或竟月不逢一
人又聞蘇浙之田多未耕種羣賊無所得食故一意圖竄江西
並窺伺皖浙已復之區平民無所得食弱者轉徙溝壑黠者則
從賊以偷生旦夕黨羽無定數酋長無定謀便恐變爲流賊更
難收拾而諸僞王中如李世賢失金華楊輔清失甯國黃文金
失蕪湖古隆賢失青陽劉官方失池州巢穴雖破醜類尙多其
意怏怏不甚服僞天王忠王之調度其行徑亦與流賊相近凡
此皆可懼之端也粵匪初起粗有條理頗能禁止奸淫以安裏

脇之衆聽民耕種以安佔據之縣民間耕獲與賊各分其半故
取江南數郡之糧運出金柱關取江北數郡之糧運出裕溪口
並輸金陵和春等雖合圍城外而賊匪仍擅長江之利挹不竭
之源傍江人民亦且安之若素今民間賊至痛恨椎心男婦逃
避煙火斷絕耕耨者無顆粒之收相率廢業賊行無民之境猶魚
行無水之地賊居不耕之鄉猶鳥居無木之山實處必窮之道
豈有能久之理而東南要隘如安慶蕪湖廬州甯國東西梁山
金柱關裕溪口暨浙之金華紹興此皆山川筋脈必爭之地但
求此數處不再失守終足以制該逆之死命昔年粵賊所至築
壘如城掘壕如川堅深無匹近亦日就草率而官軍修壘濬壕

今實遠勝於昔賊中羣酋受封至九十餘王之多名爭雄長苦
樂不均敗不相救而官軍仰承

聖謨三江兩湖水陸各營和衷共濟呼應靈通至百姓仰戴
皇仁淪肌挾髓雖臣等撫綏無術治軍無效斯民久陷水火之
中曾不一聞怨咨之語翹首而望平寇擊壤而謳吾

君意者民心所在天祐孔長此皆可喜之端也臣從軍數年從
未敢以賊勢稍衰入奏惟念西北軍興

皇太后

皇上焦勞彌甚故將南中可喜之機陳述一二仰慰

宸厪至可懼之端臣殫竭愚慮勉思補救裏下河若有疎失當

在此兩月之中難亟謀挽回之術若竊號巨股變爲流賊昔
文宗皇帝嘗慮及之但求金陵蘇杭三處有一二克復卽當大
赦羣首廣爲招撫以庶幾赤眉百萬同日納降之盛軌此中自
有天意不盡關乎人謀理合密陳

上諭會國藩奏由金陵回皖沿途查閱近日軍情及密陳可懼
可喜數端各摺片逆賊續由江浦縣新河口營壘逡巡西竄巢
含全椒之間九袱洲逆壘尙未攻克賊蹤紛竄江北時切憂思
南岸則金柱關徽州休甯紛紛告警該大臣已令鮑超等軍分
道馳援著卽與左宗棠所派劉典之軍合力攻剿保全徽境其
劉連捷毛有銘等營分紮地面甚寬務與西梁山運漕鎮及無

爲廬州竭力固守俟李續宜江忠義到皖兵力較厚再行相機
進取至池州兩岸及西梁山大勝關等處難民編葦而棲析骸
以食死亡灰燼之餘不堪目擊等情閱之殊深憫惻如有可爲
倡率捐賑之處著該大臣酌量辦理 當公之東下視師也賊
攻常熟益急初四日常勝軍李恆嵩以千人往援潘鼎新張樹
珊移逼賊營初五日常勝軍然礮擊賊城賊來援倚營而陳欲
登同觀山塔山窺我後路劉銘傳擊敗之是時李鶴章程學啟
等進攻崑山太倉築石卡蓬萊鎮以扼要道連捷於太倉西門
及萊葭濱青陽港等處賊聞官軍在崑太獲勝益具雲梯鑿地
道攻常熟城十五日劉銘傳進王家橋賊適由小市橋窺西路

攻之而洋將戈登亦至十八日黃翼升水師登岸列隊山後劉銘傳潘鼎新伏同觀山左右以小隊誘敵張樹珊列陣毛家山前常勝軍設大礮於福山山城之巔列小礮其旁盡然之呂宋兵乘小舟薄賊壘駕浮橋死士伏城牆下日方中奪福山石城乘夜復襲之毀其營盡十九日周興隆等登城見賊入西山而福山火起乃開四門悉銳出擊賊無關志盡潰擒偽孝天義朱衣點常熟解圍左宗棠擊賊於富陽大敗之自官軍克復桐廬新城蕭山之賊麇集於富陽復以戰船溯流上拒宗棠遣楊政模自桐廬擊楫而下遙見賊船數百號排列城下令師船作兩層排齊疾進頭隊繞向南岸直攻其中俟賊礮船上犯我軍

後隊應之百礮齊發江流鼎沸火箭噴筒並注賊船須臾皆盡
賊棄船入壘我軍亦上岸蹙之毀堅壘二座遂駐營富陽宗棠
復遣蔣益漴魏喻義等會軍圍之 左宗棠遣軍徇皖南獲勝
初胡黃古賴諸賊分踞皖南州縣又有花旗廣匪尾之而行初
十日賊從藍湖米坑窺祁門北界宗棠部將王文瑞率郭德馨
等邀擊於半途賊敗潰追至藍湖賊復回拒藍湖之左有敗賊
張蓋騎馬笑出麾賊迎敵郭德馨馳斬其一餘賊翻山竄逸追
過米坑十餘里生擒僞軍政司蘇四達黃齊升美天福張北湖
被天福張小滿賜天燕易高明僞丞相王大吉謀天福鍾有朋
等 是月僧親王擒捻酋張落刑斬之 川軍敗石達開於越

陝西軍收復紫陽縣 三月公弟國荃彭玉麟遣軍會援
石澗埠擊賊破之初賊自江浦上犯圍毛有銘劉連捷於石澗
埠初三日賊束草如山各負片板撲我營毛有銘劉連捷排礮
環擊殪其前鋒賊猶晝夜猛攻相持不下糧運汲道一時俱絕
國荃遣彭毓橘率馬步八營倍道馳援玉麟亦派水師渡江助
之遂與蕭慶衍會軍黃雒河十六日玉麟遣死士溷入石澗埠
密約詰朝會戰是夜四更彭毓橘進攻釘子壩皇圖寺蕭慶衍
等進攻黃龍岡迎珠塔毛有銘突圍出攻草鞋嶺劉連捷出攻
石澗埠之卡王載駟等戰賊於羊虎山諸軍瞥見黃龍岡迎珠
塔火光突起知黃雒河援軍得手乘勝猛進彭毓橘亦自皇圖

寺來會縱橫盪洗羣壘悉平而東關援賊亦爲水師堵退賊紛
向小嶺開成橋而遁 李鶴章程學啟會洋兵克太倉州初太
倉踞賊僞會王蔡元滙遣人乞降許之期於初九日迎師李鶴
章與程學啟嚴陣以待鶴章軍已渡河將入東南門伏賊數千
忽起我軍急退亡數百人李鶴章傷足幾及於難程學啟方扼
西門猝見賊舟數十自崑山來城賊與語甚暱疑而爲備賊果
出犯學啟奮擊卻之於是洋將戈登偕李恆嵩率師來助十四
日僞際天福李文熙率礮船截河口程學啟以洋鎗隊襲其後
而自督水陸迎之賊不能遁殲焉戈登以大礮毀二石壘十五
日我軍環城發炸礮日將晡城裂緣缺口而進賊走南門不得

出捕斬幾盡王文瑞等敗賊於祁門遂會江西軍克黟縣時僞堵王黃文金僞佑王李遠繼勾結太平石埭賴古兩酋由建德過新安嶺至太白鋪渚口等處逼近祁門西路黟縣之賊亦時擾祁門東路王文瑞以賊氛四通調駐守漁亭之丁長勝回祁助剿初十日賊至城西干佛橋小路口距城僅十里十一日王文瑞督隊分路迎剿敗賊於七里橋追至小路口陣斬僞佑王李遠繼斃賊七八千人是時劉典與江西軍王沐規取黟縣十六日行次漁亭瞭見賊踪綿亘數十里度賊衆我寡利在速戰十七日劉典與王沐分路進剿甫近賊卡大股數萬人蜂擁而前適黃少春率左路各營沿崖而下中右兩路一齊猛進賊勢

大潰追至黟縣城下賊回撲數次我軍復擊敗之乘勢奪門而入賊由東門竄走遂克其城劉典復分軍搜剿黟縣境肅清十九日賊犯廬江縣吳長慶等擊卻之二十一日賊犯舒城縣蔣凝學擊卻之擒僞天將羽天福於陣二十二日朱品隆破賊於石埭二十三日賊圍六安州王臨祥曾廣翼力戰卻之斬富天豫張承得擒僞左監議劉柱公以六安爲淮南樞紐恐僞忠王李秀成與苗捻勾合愈不可制乃檄鮑超由廬江往援劉連捷彭毓橘毛有銘由無爲州往援鮑超將至舒城賊解圍遁往廬州

詔授公弟國荃爲浙江巡撫左宗棠爲閩浙總督兼署浙江巡

撫

諭曰閩浙兩省兵勇均歸左宗棠節制耑齡所部廣勇著左宗棠揀員統帶曾國荃卽著仍統前敵之軍駐紮雨花臺一意相機進取以圖金陵毋以浙事爲念東南軍務惟在該督撫等戮力同心共圖挽救國家異數酬庸諒能並矢公忠以副委任也

公與國荃交疏懇辭

上諭會國藩奏爲伊弟國荃懇辭巡撫恩命並曾國荃奏懇收回成命各摺曾國荃自統師南下以來迭復沿江名城要隘駐軍雨花臺連破逆壘與彭玉麟鮑超等水陸諸軍爲規取金陵之計朝廷以會國荃勲績卓著擢授浙江巡撫並令仍統前敵

之軍一意進取論功行賞國家自有權衡茲覽該大臣及該撫所奏深以金陵未復兵頓堅城而該大臣兄弟異數頻邀旣榮授以封圻復令駐軍江南遙領疆寄深虞隕越弗克負荷在該大臣受寵若驚固辭恩命洵屬至誠而朝廷旌賞楨官權衡悉當現在軍事方亟時局孔艱凡在臣工正宜黽勉效忠共期宏濟該大臣惟當督率會國荃忠誠報國以副委任正不必賁辭朝命也 四月初七日公弟國荃會彭玉麟克東關初玉麟商令國荃部將彭毓橘會蕭衍慶等攻銅城關水師曾泗美會國荃部將劉連捷等攻東關初六日夜水師由蟹子口潛渡陸軍緣堤埂而進伏於九峯山下另遣譚國泰率勇士數十人從東

關近處以木盆偷渡毀柵越壕突逼壘下肉薄而登賊以礮石外擊密若飛蝗胡德雲石太和從煙燄中駕梯直上中礮死之劉連捷會泗美水陸夾擊賊惶遽欲遁九峯山下伏兵齊出合軍衝殺遂克東關石壘次日援賊悉銳來爭劉連捷毛有銘復擊卻之初十日彭玉麟克銅城閘玉麟旣克東關令喻俊明等鑿開土埂師船從決口駛入南北兩路直薄賊巢更番擊之而留彭毓橘所部扼守八角廟分蕭慶衍所部移剿百旺市五顯集先清銅城閘後路慶衍將兩處卡壘一律平毀水師之圍南北圩者乘勝猛攻陸軍亦萬鎗齊發五更時踰破南街土壘遂攻破銅城閘十八日易開俊敗賊於涇縣章家渡朱品隆

敗賊於青陽時公弟國荃圍攻金陵已久賊百計欲解圍分股由徽甯窺伺江西由六合一帶圖犯湖北而由湖北下竄之捻匪自蘄水分爲兩股一股回竄黃州一股竄撲宿州松越潛太以撲廬桐髮捻兩逆聯成一片公搜獲僞文有由舒六而竄英霍分道援鄂之語因疏陳逆謀甚狡而規畫甚大情形

上諭此時會國荃雨花臺之軍自不能輒自移動墮賊詭計湖北爲數省樞紐誠不可稍有疏失嚴樹森出駐團風當不至任賊竄入羣醜蓄謀紛竄會國藩所部各軍幾於應接不暇該大臣素能鎮定惟當毅力精心以圖萬全浙滬兩軍事機尙賴左宗棠以杭城不難卽克而難於杜賊紛竄是以不急旦夕之效

固屬老謀此時賊旣紛竄北岸及長江上游浙滬兩軍如能一克富陽以取杭州一克崑山以取蘇郡則金陵之賊腹背受敵或可卽收擣穴擒渠之效該大臣等必能因時審勢以赴事機也又

諭會國藩現駐皖省爲中權扼要其北自巢含舒桐以至英霍賊氛密布髮捻交乘又值苗沛霖復叛潁壽六安逆練紛紛撲擾凶燄頓張金陵逆黨自九洑洲北渡聲言就食不卽擾及裹下河等處而直上和含且與捻苗各匪均相勾結殊恐賊之蓄謀故爲此包鈔大舉勢將圍裹安慶以解金陵之圍會國荃之軍逼城爲陣不能遽撤會國藩所部桐舒守將僅能自固鮑超

一枝勁旅往來策應兵力已不甚厚恐賊乘兵分備單之時麇集羣醜四面圍逼該大臣駐紮江潯實爲東南大局安危所繫南顧彌增厯念刻下皖事孔亟計惟浙軍尙屬切近左宗棠務與曾國藩聲息相通緩急可爲援應方爲妥善 二十二日公弟國荃遣劉連捷彭毓橘克巢縣 二十四日劉連捷彭毓橘會鮑超克含山縣 二十五日鮑超蕭慶衍克和州於是皖北之賊遁去而皖南之建德被官軍收復賊燄稍衰 二十七日公弟國荃攻雨花臺僞城及聚寶門石壘九座皆下之初僞忠王李秀成自六安敗後率衆東竄聲言回救蘇州李鴻章函商國荃力攻上游以分賊勢國荃度忠逆不同援蘇巢卽竄犯揚

州裏下河計莫如急爭金陵老巢攻其所必救使城下之賊不
暇遠趨蘇郡而北岸之賊亦不敢專注揚州乃激厲各軍先登
者賞退後者誅是日漏甫二下齊隊出濠六路併進各路以一
營爲先鋒兩營爲策應令李臣典趙三元武交清等專攻雨花
臺石城趙清河等攻聚寶門外南卡石壘晏澧周等攻西卡石
壘何玉貴等攻東卡石壘又令陳湜出中路應之蕭孚泗出右
路應之易良虎出左路應之前鋒各營於三更時匍伏蛇行偷
近石城石壘束草填壕架梯欲上賊遽驚覺然礮外擊我勇中
礮而踣者五人衆勇辟易李臣典立斬二卒擐旗直前軍中無
敢少後者羣以火箭火毬盤空飛擲悉入石城天漸嚮明趙三

元率中軍親兵從礮臺下蟻附而升李臣典武交清率所部從中右兩路肉薄齊登維時敵樓火發賊方爭相奔救不料烟霾中人聲鼎沸亂鋒交下我軍已奪偽城一座矣諸將乘勝猛攻東西南各卡九壘皆克羣賊潰奔蕭孚泗易良虎陳湜追擊於長干橋感偏入水者無數國荃以雨花臺地段遼濶近接長圍賊所必爭乃抽四營駐守石城增修六新壘以接各營之氣未幾城賊大出潛匿附郭屋舍以誘敵我軍蓄銳不發賊不得逞遂繞雨花臺乘我新營未定悉銳猛攻抵死不退我軍四面搏擊死者大半餘賊負創鼠竄入城是役也俘獲二百餘名殲戮六千餘人奪獲礮械無算賊勢從此衰減矣 程學啟等克崑

山縣學啟以崑山環城皆水上有陽澄巴城兩湖下有清陽江
皆阻絕不能飛渡由陸路至蘇州必道正義鎮舊有四賊營蘇
州援賊屯焉我奪而據之斷其援而絕其竄路賊膽墮破之易
且殲其衆乃會郭松林等攻正義斬賊三千餘戈登率常勝軍
繼至賊盡潰僞慕王譚紹洸率衆四萬來爭併力敗之郭松林
滕嗣武扼守隘口程學啟會諸將極力攻城紹洸遁走遂克崑
新兩縣時劉銘傳駐常熟之鹿苑聞崑山旣克進攻楊舍汛克
之左宗棠軍擊賊於富陽新城敗之是月四川總督駱秉
章破賊於老鴉嘴僞翼王石達開伏誅達開自與僞北王韋昌
輝構讐後屢犯浙江福建湖北湖南廣西廣東諸省並擾及滇

黔蕃意入川以圖竊據是年春達開率十餘萬衆由滇入蜀建
南大震布政使劉蓉白秉章請自赴雅州視師秉章許之蓉自
督諸軍遏其前密調各土司截其後屢戰皆捷四月初四日達
開搶渡金沙江我軍擊走之遂撲松林小河趨天全蓉檄土千
戶王應元等扼河力戰斃賊數千人十二日蓉遣都司慶吉土
司嶺承恩等夜劫賊壘據馬鞍山絕其糧道達開自知陷入絕
地傾巢出撲大小兩河唐友畊擊沉賊筏二十三日達開親擁
大股水陸分撲我軍沿河拋置火彈火箭以禦之都司謝國太
泰將楊應剛由松林小河馬鞍山兩路齊進攻毀柴打賊巢賊
紛紛逃竄漢土兵練兩面夾擊賊墜巖落水浮尸蔽江而下達

開率餘黨七八千人奔至老鴉璇復爲土兵截殺達開進退無
路爲楊應剛等擒獲蓉令械繫解省凌遲處死餘黨三千人皆
聯誅之自僞天王洪秀全倡亂廣西封五僞王以自輔僞南王
馮雲山僞西王蕭朝貴在湖南擊斃僞東王楊秀清僞北王韋
昌輝自相殘殺惟僞翼王石達開素假仁義以籠絡其下至是
爲川軍擒戮五僞王皆伏誅天下快之 五月初三日賊由太
平石埭分竄茂林涇縣易開倭擊敗之斬首千級 初十日彭
玉麟楊岳斌鮑超會復江浦浦口時僞忠王李秀成在江北聞
我雨花臺之捷益惶懼又以崑新旣克恐滬軍大舉圍蘇乃與
諸僞王改圍南渡於是天長六合來安次第解圍而賊之分踞

橋林小店者冒雨掠舟江面人聲喧闐不絕蕭慶衍度江浦浦口各賊無固志遣騎隊襲之行未中途聞浦口之賊棄城遁走江浦之賊獻書詣營乞降鮑超劉連捷察知其詐初九日引軍疾進蕭慶衍出烏江與水師約戰岳斌玉麟師次江浦賊聞風宵遁竄併九洲洲上僞城閉而不納賊向蘆葦中駭竄墜入濠溝溺死者以數萬計我軍遂收江浦浦口二城次日餘賊餓啼江邊復爲我軍輪攻蹙入江中者不計其數江北肅清 十三日公弟國荃會水師攻下關草鞋夾賊壘八座皆下之遂克燕子磯自我軍克二浦將有事於九洲國荃乘夜至新江日與彭玉麟楊岳斌會勘形勢見九洲在驚流急湍之中僞城

高峙巨礮層列對岸有攔江礮中關諸石壘又有草鞋夾下關
七里洲燕子磯十數堅壘賊以礮艦倚護之國荃度陸師難飛
渡計莫如先取南岸數隘十二日遣丁泗濱等爲頭隊從下關
進喻俊明等爲二隊從草鞋夾進彭楚漢等爲三隊以應之玉
麟率水師據九洑洲上游以牽賊勢次日天未濶明丁泗濱喻
俊明彭楚漢等循南岸飛駛而下將偪賊巢賊萬礮齊發猝不
得近我軍預以枯荻灌油縱火江上先焚其舟數百賊艦一時
俱燼衆勇緣牆而登或從礮眼中搶險而入遂平下關草鞋夾
八賊壘移師轉向中關水流箭急我軍舍舟登陸胡俊友中礮
陣亡十四日國荃分兵襲破燕子磯毀壘而還 十五日公弟

國荃會水師克九洑洲先是楊岳斌詢諸土人知江濱叢莽中有堤埂一道可達九洑洲賊濠之外至是國荃令陸軍劉連捷等由隄埂缺處鳬水而進彭楚漢等從洲尾攻上張錦芳由洲頭攻下喻俊明等繞洲奮擊另遣丁泗濱等由南岸分領水師直趨是日昧爽兩岸並舉人人殊死戰賊之在中關者附城爲壘卒不稍動其堅踞九洑洲者下有賊划上有僞城千礮環轟片刻不息又於東西南三面分伏洋鎗悍隊伺閒出擊損我精銳不可數計彭楚漢等負創角戰至日晡賊少怠我軍乘月色昏暗中移船潛近賊壘會西南風大作衆軍以火箭攢射立焚水中拖罟數隻風烈火猛燃及洲上卡房喻俊明等麾軍直上

成發翔等在左彭楚漢等在右各率弁勇大呼升岸丁泗濱亦
自中關鼓棹而來躍過重壕肉薄齊登前者旣殪後者踐尸更
進漏二鼓我軍撲入牆內聚殲羣醜無一脫者十八日國荃攻
長干橋賊壘又破之於時易開俊等破賊於涇縣朱品隆敗賊
於青陽長江上下一律肅清

上諭都興阿奏楚軍攻克二浦及七里九洑等洲一摺九洑洲
爲江中要地賊踞堅壘數年之久此次克復竟能敏速如此曾
國藩奏報想已在途著將詳細情形馳奏金陵勢成檻穽其機
大有可乘應如何相機進擄使賊應接不暇之處曾國藩諒必
成竹在胸惟水陸寬廣裊下河一帶尤應嚴密設防着曾國藩

都興阿等於南北兩岸相機妥辦 公覆疏云竊二浦九洑洲等處距揚州較近而去安慶甚遠揚州距京較近而安慶又稍遠臣於二十一日聞九洑洲克復之信二十五日始接各營公牘卽於二十七日馳奏驛路阻長不得與都興阿同時奏到早慰

宸厪致

朝廷殷殷瞻念無任慚悚

諭旨垂詢餘匪紛竄妥籌堵剿及嚴防裏下河一節臣查三月之杪僞忠王銳意犯鄂自攻撲石澗埠廬舒六安等城連不得逞折而東趨又聞其銳意以犯揚州並犯裏下河厥後李鴻章

之兵攻破崑山進逼蘇州會國荃之兵攻破雨花臺各石壘而
集縣和含次第克復於是逆謀大亂紛紛南渡遑救蘇州近救
金陵天六來安瓜州之賊不擊而自退江浦橋林浦口之賊不
攻而自破在忠酋之意收回江北羣賊以全力保守江南僅留
精銳分守九洲洲七里洲等壘與金陵相犄角爲堅拒不拔之
基不料我軍大舉進攻正直羣賊甫渡中洲未達南岸之際凡
競渡之賊與守壘之賊蟻集於濠汊蘆葦之中各炮船繞洲圍
攻登岸搏戰數萬悍寇悉數聚殲縱偶有倖脫者亦不過逃歸
金陵老巢實未嘗紛竄江北致敗裏下河之患此臣自去冬以
來所深慮至是始稍釋隱憂者也

諭旨垂詢如何相機進擣會商浙滬攻取蘇杭一節九洑洲市克以後臣卽檄鮑超南渡檄蕭慶衍防守二浦旋接楊岳斌會國荃來函請調蕭慶衍同渡南岸紮駐神策門一帶而以鮑超一軍繞過鍾山直達孝陵衛漸圖合圍爲持重之謀者則以城垣太廣兵力太單不宜遽求合圍恐大股援賊齊至一隙可乘全局俱震爲制敵之謀者則以浙攻富陽滬攻蘇州金陵亦宜迅速合圍使該逆備多力分不能兼顧或者致力於金陵收效於蘇杭三處有一得手兩處可期並下臣亦主合圍制敵之說與

諭旨所示使賊應接不暇者暗相符合特勁旅無多不足以斃

深根之寇擬俟江西邊境蕩平再調江忠義等軍由皖南漸趨東壩會剿金陵一面咨請揚州鎮江防兵前來協剿亦非旦夕所能集事此籌剿金陵老巢之大畧也奉

旨如議辦理 劉銘傳郭松林擊援賊於江陰敗之 左宗棠

遣劉典等敗賊於饒州陶家渡 六月鮑超進軍鍾山將移紮

孝陵衛因軍士疾疫仍駐神策門 程學啟戈登克吳江縣

王文瑞克黟縣 二十二日洪秀全遣黨出儀鳳門犯鮑超營

又出太平門犯劉連捷營我軍皆擊卻之 七月初一日賊犯

下關營壘李成謀劉連捷力戰卻之 初三日劉典江忠義會

擊湖口之文橋平賊壘七座僞堵王黃文金竄皖南江西肅清

初八日公弟國荃攻克印子山賊壘時金陵尙未合圍國荃擬增募萬人爲大舉包城之計

上諭金陵賊勢窮蹙官軍攻剿喫緊之際該逆因猷猶關勢必拚死抵拒曾國荃所奏旬日間戰守各情諸軍將士皆能奮勇倍加喋血苦戰曾國荃現在調集江浦浦口之蕭廣衍七營過江駐紮七壘橋河邊扼守秣陵關小河進城之路並以金陵城大尙須添募萬人以冀合圍剋期蕩掃惟江浦浦口等處防兵亦不可過於單弱著曾國藩與曾國荃妥籌相機辦理仍須謀出萬全以期必勝 程學啟克太湖賊壘進薄蘇州初程學啟布置吳江防守之具旣畢歸唯亭舊營兼顧蘇崑賊連犯夾浦

援及平望同里學啟由唯亭至吳江與太湖水師會夾浦口時太湖賊船如織蘇杭往來無阻初六日學啟督師船百艘鎗隊八百人嚴陣而進盡下沿湖賊卡湖濱大缺口賊立四營一卡距東洞庭山九里爲蘇嘉賊津渡初七日學啟令謝梁鎮引師船列蘆葦中陸師涉水以登親軍設炸礮當中路太湖水師分攻其東西歐陽利見截賊後攻竟日不下學啟謂賊營如鳥翼宜先破其北岸遣死士五百越水夜襲之初八日黎明已毀其石牆踰濠上利見扼飛虹橋梁鎮斷其浮橋賊不能遁其僞臨天義以下皆就戮初九日學啟歸唯亭旋督所部十營進屯蘇州外跨塘鳳皇頸唐家濱水師進金雞湖獨池湖大牛橋洋澄

後湖以逼婁葑兩門是爲規取蘇州之始 十七日吳坤修敗賊雙斗門 三十日公弟國荃攻上方橋賊壘克之上方橋爲金陵東南隅糧路國荃令蕭慶衍進兵圖之二十日蕭慶衍率七營出印子山之東偏賊壘而下城賊與七壘橋之賊竭力來爭國荃令蕭孚泗張詩日李臣典分隊堵禦我軍濠牆逾時卽成二十二日遣李祥和凌有和等懷營而進更紮蕭慶衍新壘之前賊擁衆猛攻撲我軍力擊卻之壘成後昇巨礮晝夜環轟賊堅壁不出二十九日國荃潛遣熊登武等繞過上方橋五里許搶築六小營以截賊後賊懼糧路絕糾大股來撲蕭孚泗等麾軍迎戰小有斬擒伍維壽等以騎隊包抄賊始駭潰合軍追

及秣陵關破十餘卡盡奪河下賊船蕭孚淵度賊勢已窮令軍士各負枕捍乘夜擁至濠邊競拔地鍬大呼猛進比賊驚覺前鋒已躍入壘曙色朦朧抽刃偪近悉殲羣醜罕有脫者 八月初一日劉銘傳郭松林周盛波克江陰縣 初八日左宗棠軍克富陽縣初宗棠遣蔣益澧圍富陽值疫氣盛行將士物故城久不克而劉典方轉戰江皖王文瑞駐守祁門均未回浙迨江西肅清劉典引軍還欽相距較近宗棠飭康國器赴富陽助剿蔣益澧令法國總兵官德克碑帶西洋大砲爲轟城攻壘之計初七日益澧令徐文秀繞城北攻鷄簷山賊壘克之適新橋出賊千餘來援徐文秀就賊舊壘背水爲營以師船護之連放炸

破攻城賊大震時楊政謨率水勇德克碑率花勇越嶺而下攻倚城各壘賊死拒不退徹夜轟擊殲斃無數次日黎明益漴督軍往助士氣倍奮攻破賊壘一座賊靡亂不敢入城向新橋而遁益漴令徐文秀由雞籠山繞出新橋併力追殺遂將縣城克復並攻毀新橋賊壘二十餘座宗棠卽飭康國器由富陽趨餘杭蔣益漴直薄杭城逼清波門鳳山門而營是爲規取杭州之始 十二日公弟國荃攻江東橋克之江東橋石壘高峙環繞木城外隔水二道賊以有險可恃負固拒守國荃遣陳湜攻之數月未下湜憤甚十一日夜風霾蔽月湜選銳卒數百涉流而渡匿壘下噴筒望空飛擲賊方驚眩我軍已衝過浮橋拔花籬

左右分抄至旱西門賊恃牆堅礮利連環轟擊而藥筒已焚及木城各勇肉薄齊登負傷輒蹶提抽刀壓陣士卒不敢卻顧十二日味爽遂拔石壘及衆壘皆下之十六日陳學啟戈登攻蘇州寶帶橋克之初程學啟屯外跨塘離婁門七里賊附城築壘十有九礮遠不能及學啟乃移營前進至永安橋賊由婁葑齊三門出洋人百餘舁炸礮助賊學啟水陸三路嘗之賊發礮彈多不炸退入城我軍遂營永安橋初十日譚紹洸黃子樞等率七僞王以六萬人分門出學啟復分應之戰竟日賊始敗十一日僞忠王李秀成自金陵返蘇州圖解圍戈登率常勝軍與學啟會剿婁葑門外賊壘旣多且固賊時發炸礮拒我猝不得

前而城東南寶帶橋實爲太湖鎖鑰明徐達破張士誠故道也
賊立石營一土營三守之學啟戈登謀先破此遂於十六日令
水陸各軍先乘土營賊棄壘奔截殺之石營旋潰追之至盤門
毀途中十餘卡遂令戈登與法國兵官屢發駐寶帶橋 李鶴
章郭松林擊賊於無錫大破之初郭松林至緱山營於新塘橋
攻城不下松林與部將王平西易用剛李長樂裹重絮禦賊鎗
踰濠乘牆手及黃衣賊數人賊駭散追之亭子橋僞潮王以城
賊出拒復敗之及其肩幾就擒賊亦矛傷松林股始逸二十
二日松林偕滕嗣武自東亭追賊九里街及東門分隊擊走南
門賊二十六日僞侍王李世賢僞璋王林紹璋率賊數萬自南

門至坊前梅村而高橋賊數千出芙蓉山後城賊出北門犯塘頭東亭二十八日李鶴章登緱山分遣諸軍應賊各路皆捷於林奪賊船百餘艘擒其酋數十人二十九日李秀成由蘇州集偽納王郜雲官僞來王陸順得僞趙王黃章桂僞祥王黃隆芸僞紀王黃金愛並其養子忠二殿下水陸十萬偪我大橋角之營夷酋白齊文以輪船大礮助之周壽昌發連珠噴中輪船藏火藥所聲大震斃洋人數百賊大亂鶴章復令諸軍助剿圍始解追至望亭距河而返而另股犯緱山圍吳建瀛營郭松林援之斃賊千人是役也斬賊萬餘失兩僞王李秀成痛哭棄無錫而遁彭玉麟大捷於青陽賊解圍去初僞堵王黃文金率七

悍酋衆十餘萬在都昌湖口彭澤一帶戰敗而東遂略池州直薄青陽城守將朱品隆苦守三十餘日米盡食馬馬盡掘麻根樹皮以充餽道死士易服出城蠟書隱語以求援公令喻吉三陸軍彭玉麟令喻俊明水師先後至徐家邨二十一日喻吉三捷於袁橋二十五日席寶田更進五溪橋踰嶺破卡賊驚潰黃文金乃數賊轉鬪而前寶田抄入卡後文金從亂軍中逸去我軍始振適玉麟自池州來周厯形勢分遣諸將進攻二十七日五更蓐食水陸大舉黃文金糾大股數萬環布壘外冀抄我後江忠義堅定陣腳各軍衝入賊叢縱橫疊決喻吉三正在揮軍助隊賊隊忽亂敗若潮湧中路堅壘既破左右二壘俱下玉麟

遣水師兼舟登陸攻破陳家邨席寶田自五溪橋馳至遙望西北城郭一帶煙焰蔽天知守城軍自內擊出卽約諸援軍一鼓猛進悉掃賊巢是役也平賊壘一百三十餘座殲擒萬餘青陽之圍始解 劉松山援涇縣大捷賊犯甯國府松山復擊破之初太平賊酋古隆賢石埭賊酋賴文鴻等乘青陽被圍之時規犯涇縣古隆賢踞茂林潘邨賴文鴻踞丁家渡張家渡劉松山時守甯國聞警馳抵涇縣與守將易開俊會攻張家渡城館十六日攻茂林至則鳳邨李邨之賊聞風悉遁乃環攻茂林賊壘擊傷古酋燔巨壘二其潘邨三壘亦爲別隊所破追軍又平其邨後二壘餘賊遁回太平是時甯國北路之賊聞松山赴涇謀

襲郡城十四日松山馳回設伏敬亭山以待十八日賊拔鹿角踰濠競進松山突起北門鼓譟而出賊倉皇遁適西門各隊追賊而來橫斷歸路賊乃東趨廟埠又爲松山所蹙二十四日易開俊復破賊於丁塘田坊四貞邨等處追至平垣賊踰崖而逸是月陳得才陷漢中府及城固縣 九月公弟國荃攻金陵城外東南八隘皆下之自我軍攻克江東橋上方橋金陵城東尙有數隘未下近城者曰中和橋曰雙橋門曰七甕橋稍遠者曰方山土山曰上方門高橋門迤南則爲秣陵關以至於博望鎮亦金陵之外輔也國荃以東路未平不能制賊之死命遂令蕭慶衍彭毓橘蕭孚泗等擇小河紆曲之處架橋結筏謀東渡

立營拒賊賊已先據河東築數壘以拒我蕭慶衍迭用巨礮隔河迎擊十八日派朱吉玉李祥和在西岸修三營爲進兵之計賊復列洋鎗數千枝於堤埂與我軍對擊相持不下者兩晝夜二十日四更時李祥和等率隊從下游渡河蕭孚泗等率隊從上游渡河破五土壘殲賊甚衆俄而城賊蜂擁來爭蕭慶衍一面搶築營壘一面麾軍環進挫賊前銳逾時卻走而東岸之營壘已成二十四日賊又諸道並出銳不可當陳湜彭毓橘蕭孚泗派兵扼駐其中雙橋門以東不能通城賊之氣蕭慶衍率部進取中路戰入垓心我軍小卻將士憤甚相排競進賊乃靡然返竄蕭慶衍以騎隊邀斷歸路遂克上方門高橋門諸石壘而

右路方山土山之賊經熊登武等分道馳剿亦各棄壘而奔於是七甕橋踞賊惶遽欲遁蕭孚泗彭毓橘扼定東岸之左李成典等遮擊西岸之前正謀前後合圍城中忽出大股抵死來援兩軍相搏互有死傷蕭孚泗等急督各軍擊退援賊仍復偏壘環攻二十四夜令死士前往縱火賊衆冒煙突出遂將七甕橋攻克由方山而南爲秣陵關關以南爲博望鎮賊環鎮設卡者二築壘者七上可應水陽旁可控金柱關守關者爲朱南桂亦國荃部將也十八日間鮑超將有事於水陽朱南桂約會朱洪章武明良等進次小丹陽謀襲博望鎮使不能爲水陽之援夜漏四下朱南桂銜枚疾進以武明良爲右翼朱洪章爲左翼十

九日昧爽各軍齊抵博望卡卡賊負固死守鎗礮橫飛猝不得
進朱洪章俟賊少懈昇巨礮至左卡壹發而殪數賊武明良又
用火箭攢射燔及右卡羣賊駭懼撲火爭竄我軍正乘勝殺人
毀其堅卡而壘內之賊傾巢至朱南桂往來猛撲未能略挫其
鋒武明良陰率哨勇繞出頭壘踰牆而登賊聞後路人聲若沸
返顧羣壘已易官軍旗幟錯愕不知所爲朱南桂等縱兵夾剿
追賊至長流陂地方墮河而溺者強半乃引軍回駐博望奪獲
米二千石國荃以博望旣得則中和橋之勢孤二十五日派趙
三元伍維壽共帶馬步九營南略秣陵關又派陳湜黃潤昌出
七號橋之西與熊登武等會師於中和橋一戰克之而秣陵之

賊見我馬步馳至卽棄釜奔潰各營追至河干深不可涉僅斬
尾賊二百餘人而還自是紫金山西南無一賊巢矣二十七日
公弟國荃親督蕭慶衍蕭孚泗彭毓橘陳湜李臣典等往勘孝
陵衛地勢將欲分營移駐賊自朝陽太平兩門突出二枝前來
搦戰蕭慶衍陳湜率所部各當一路蕭孚泗李臣典傍城鈔入
鏖戰方酣俄有一酋指揮督陣公弟國荃知爲巨目乃匿洋鎗
隊於山麓伺其近而擊之該酋中鎗墮馬賊陣遽亂有敗往城
中者有不及回城者轉向涇化鎮大路而逸蕭慶衍陳湜等率
騎兵追至三十里外俘獲百數十人僞章王僞順王仍退入城
不敢復出矣 公疏稱金陵一城面面布置據有重險爲洪逆

堅不可拔之基自克九淤洲江東橋數隘而西南一面已爲我有茲又克復七裏橋秣陵關等隘而東南一面又爲我有現今蕭慶衍進紮孝陵衛經營城北漸成合圍之局得

旨嘉獎 二十八日僞奉王古隆賢詣朱品隆降遂收復石埭太平旌德三縣 彭玉麟克審灣金寶圩水陽新河莊塘溝等壘 蔣益澧大捷於杭州餘杭等處初益澧逼杭城而營僞歸王鄧光明僞聽王陳炳文僞朝將汪海洋及僞盲王劉酋等於附城要隘遍築堅壘樹立木柵自倉前長橋女兒橋老人販東塘西溪埠觀音橋三墩直至武林門外北新關橫至古蕩連營四十餘里拒我師八月間益澧遣高連陞洋將德克碑等攻十

里長街克賊壘一座城內忽出悍賊萬餘來撲高連陞俟賊近揮衆擊之賊敗入城益禮令高連陞等分紮十里長街六和塔萬松嶺據高阜俯瞰杭州而自率徐文秀馬德順在嶽廟相度地勢乘賊不覺克賊壘三九月初六日城賊萬餘由饅頭山鳳皇山九耀山雷峰塔分路犯我新壘高連陞等亦分路迎敵往來馳突斃悍賊數十名賊卻仍前適余朝貴等由江邊繞至高連陞復從山腳橫截而出水師繼之礮無虛發王月亮從九耀山萬松嶺一路衝殺賊狂奔入城益禮令王月亮等逼紮天馬山南屏山翁家山而以小船分布萬春廟楊家橋何母橋梧桐村之間而康國器魏喻義等之攻餘杭者亦連克花牌樓牛背

嶺栗樹村青山等卡遂進攻寶塔山文昌閣汪海洋自杭州來
援康國器擊走之鄧光明復自倉前來援我軍復擊敗之遂奪
據寶塔山文昌閣兩隘於是我軍分據要隘杭城漸成弇檻矣
李秀成之敗於無錫而遁也仍圖大舉聚賊八九萬船千餘
艘泊運河口自踞金匱之后宅初四日郭松林率所部剿賊麻
塘追至后宅歸途復阻賊松林力戰始出初八日李鶴章自督
軍設浮橋至后宅李秀成率黃衣賊隊出拒奮前奪其卡不克
初九日松林敗賊鴻山十一日松林又敗僞金王陽王之衆於
坊前梅村追至下田橋十三日秀成犯安鎮松林擊走之時賊
酋全集西路志在保無錫以援蘇州程學啟戈登由蘇城西北

橫出賊後攻蠡口黃埭皆下之十六日周盛波連破雁臺塘頭
鎮二十四日賊犯緱山郭松林設伏安鎮興隆橋賊方圍營伏
自後發駭而奔二十七日賊盡出所部欲犯緱山鶴章令諸軍
分路迎剿卻之二十九日松林追賊嵩山復進梅村毀賊十餘
營奪賊船數十艘擒僞護國軍師戶部尙書李生香及僞侯王
將以下酋數十斃僞航王唐政才秀成由麻塘來援松林自督
隊敗之近抵麻塘秀成奔入營時松林部將吳建瀛已破西倉
賊八營亦會軍至麻塘復合破其三營而秀成石營終不克松
林傷乃返 十月初二日彭玉麟克滄溪長樂賊酋楊友清降
遂復高淳縣 初三日易開俊復甯國縣 初五日公弟國基

連克涪化解溪隆都湖墅三岔鎮等隘毀賊二十餘寨金陵城東百里內肅清 初七日彭玉麟楊岳斌鮑超克東壩遂收復建平溧水二縣初東壩守賊黎立新上書水營請爲內應建平守賊張勝祿等上書陸營請獻城池玉麟率水師及吳坤修等陸師六營鮑超率馬步十三營合趨東壩正擬分軍立寨僞隨王楊柳谷馳告壘賊梗命楊輔清爲謀主乞速進兵以踐黎立新之約超督隊圍攻玉麟令水師護之岳斌亦飛梁助戰殲賊盈千楊輔清從亂軍中敗往溧陽楊柳谷獻僞城乃克東壩於是建平守賊張勝祿等十二人斬僞跟王藍仁得舉城降而溧水賊酋楊英清率萬餘人亦降我軍遂收復二城 初九日程

學啟戈登克許墅關許墅關爲蘇州赴無錫大路僞來王率悍
賊守之戈登先往程學啟由黃埭繼進黃翼升水師助之戈登
已破王瓜涇學啟復破觀音廟遂會軍關口攻克之進毀十里
亭賊壘於是楓橋虎邱賊皆遁 十三日李鶴章劉銘傳等克
東亭初僞侍王李世賢踞東亭李鶴章屢攻未克乃令諸將次
第翻營僞世賢初八日我軍已逼賊發炸礮擊賊營猶阻於河
初十日郭松林劉銘傳復進營河干合擊世賢營毀其牆數丈
十二日李世賢約陳坤書由常州來助黃子澐亦自無錫出新
塘街鶴章令松林等設伏世賢營後水師緝其衆不得與援賊
合乃分道擊援賊竟夜屢敗之次日復繞東門要道築一營賊

漸怖銘傳乃乘夜襲世賢焚其更樓伏驟發破世賢土城餘賊
迷道四走世賢猶踞浮橋以殿諸將敗援賊方回軍至乃大奔
追之至南門尙未曙時李秀成在麻塘不虞我軍至遽潰掩殺
之斃賊逾萬於是陳坤書遁歸常州李世賢遁宜興溧陽李秀
成由北望亭繞靈巖木瀆之徑入蘇州城 十五日公弟國荃
遣軍進紮孝陵衛 十八日蔣益澧敗賊於杭州初益澧遣將
分紮天水橋護國橋並於方家橋太平橋添築二壘是日賊自
長安橋女兒橋來犯而杭城新添嘉興賊數萬亦分路由萬松
嶺撲我營時洋將德克碑帶花勇前來助戰令淺水輪船放開
花大礮楊政謨等率師船擊退沿河之賊登岸衝殺賊見水陸

大至分投迎拒酣戰兩時賊大敗其由清波門出者亦爲王月
亮所敗俱遁入城 二十五日李鴻章克蘇州省先是程學啟
攻蘇州營於婁門累月未克鴻章親至學啟營周察城東南益
下令破賊十六日夜漏四下軍士銜枚設浮橋猛攻之賊伏斷
橋下以洋槍狙擊戰已達其壘矣而常勝軍傷亡多不得進僞
忠王李秀成方由間道入城助譚紹洸爲守十九日我軍盡出
炸礮二十餘轟其壘學啟緣南岸戈登緣北岸鴻章親督之日
過午牆傾十餘處賊當者輒碎伏窟中秀成紹洸率萬人突出
婁門拒戰學啟令驍將王永勝陳忠德陳有昇周良才龔生陽
朱寶元等分應之稍卻常勝軍肉薄以登長城石壘皆破秀成

紹洸遁入城陳東友水師由黃天蕩登岸擊賊婁葑門外賊二十餘營悉盡二十日齊門賊自驚擾黃翼升況文榜水陸乘之而潰而嘉善守將楊鼎勳以洋槍隊千人會張遇春克盤門賊壘於是我軍水陸三面薄城賊兇懼譚紹洸最名兇忍所部粵賊皆悍黨至是猶死守而邵雲官等有貳心密款於副將鄭國魁乞降學啟單舸見雲官等於城北洋澄湖備得其要領命斬秀成紹洸以獻諸酋不忍於秀成諸圖紹洸二十一日秀成微覺之顧事已無可爲涕泣握紹洸手爲別乘夜出胥門由靈巖木瀆以去官軍攻益急二十四日紹洸以事召雲官携僞天將汪有爲往卽坐刺殺紹洸并殺其黨千餘人夜開齊門迎降學

啟令鄭國魁以二營入城二十五日獻偽募王譚紹洸首請驗
學啟入城撫視時降酋之列名者八人精壯猶逾十萬諸酋方
歃血誓生死乞學啟請於鴻章要總兵副將官署其衆爲二十
營仍屯閩胥盤齊四門雲官且未薙髮學啟密白鴻章恐不可
制必誅之以定衆二十六日加午僞納王郅雲官僞比王伍貴
文僞康王汪安均僞甯王周文佳僞天將范啟發張大洲汪懷
武汪有爲並出城請鴻章受謁察其狀誠叵測乃駢戮焉各軍
搜戮拒命者復二千餘人二十七日鴻章整部入城捷聞
上諭逆匪盤踞蘇城與金陵杭州互爲犄角此次蘇城得手他
處自不難迎刃而解惟忠逆率部萬人出胥關由光福靈巖一

帶小路搭船而去此路係前次該逆由潯關潛入蘇城之路恐復自立一幟擁衆據我要隘或竄出重圍紛擾他處著李鴻章迅卽查明忠逆下落具奏該逆不得志於蘇必將肆毒於浙左宗棠務飭蔣益澧嚴行防剿蘇垣旣克杭城賊勢漸孤著卽奮力攻克以成破竹之勢金陵至蘇之路已斷恐該逆仍思鉅走會國荃須加意慎防乘隙圖取石城曾國藩總統諸軍尤當督飭各處帶兵大員慎益加慎以成全功同膺懋賞 十一月初二日李鶴章劉銘傳克無錫縣初鶴章滾營與賊搏旣力邵秀成等重圍復克高橋賊營厯十晝夜不得息我軍旣克蘇州李秀成之衆方遁而西乘小輪船毀無錫西門橋以出繞至萬壽

橋遣賊乘霧圍我營其輪船發炸礮衝高橋水師若將致死劉
銘傳率百人伏河埂膝行而前以洋鎗斃其駕船夷酋賊乃匿
伏駛其輪逸去而圍營之賊方挾草填濠見輪船已西始惶懼
我軍棄壘乘勝進南門周盛波進北門張樹聲進東門賊酋黃
子澂聞蘇州旣斬降酋率七萬人守尤力初一日郭松林等破
惠山及亭子橋石卡次日松林等破東南北土營俱盡望城賊
漸移疾逾河昇梯以登賊不能拒猶巷戰悉數殲焉周壽昌擒
僞潮王黃子澂郭松林擒其子黃德懋並獲僞酋數百人駢誅
之捷聞

上諭忠逆李秀成自十年春間疊陷蘇杭各處盡得東南財賦

之區日益強悍至去歲賊勢屢挫各城反正精銳散亡洪逆驚惶失措猶賴忠逆回援金陵王持守局該逆以蘇州爲分地事急仍須反顧其部衆逆酋尤以譚紹洸邵雲官陳炳文鄧光明黃子澂等爲尤衆且悍此次蘇錫兩城之克李秀成巢穴旣失黨羽亦孤踉蹌四走隨行僅止兩萬餘人將赴金陵解圍計不得施則挾其母妻眷屬由浙皖交界竄走江閩以尋回粵之路李鴻章自入蘇城徧察賊中規畫守禦頗饒賊智深以此酋逸出江閩仍恐蔓延爲患其常州護逆陳坤書不甚耐戰杭州之陳炳文鄧光明聞忠逆勢敗思歸多不願從惟溧陽侍逆李世賢戰守俱悍且與忠逆同惡相結而陳鄧兩逆以嘉湖蓄糧甚

多必須死守幸而官軍各路布局皆穩金陵杭州再有一處得手賊更瓦解卽著曾國藩飭令曾國荃及左宗棠聯絡進取該督撫等務須隨時函商層層進逼萬不可稍涉遲延 初五日公弟國荃治地道成轟陷金陵城十餘丈賊內築月城下穿橫洞我軍不能克傷亡三百餘人 公疏稱蘇州克復而後聞僞忠王之計將入金陵攜洪酋以出竄臣觀洪酋之堅悍未必肯棄金陵而竄他處目下當以全力謀破堅城一面布置各軍分堵上游事機愈順圖謀愈不可不慎奉

旨如議 潘鼎新劉秉璋克平湖縣遂收復乍浦汎海鹽縣澈浦鎮孟河汎等城 十三日金陵城賊撲營公弟國荃擊卻之

初僞忠王李秀成自蘇州逸出統衆數萬分布丹陽句容龍潭石埠橋等處初十日秀成率數百騎由太平門入城國荃令蕭孚泗李祥和等附城修月牆至是賊出大股來犯我軍力戰卻之賊亦傍城增壘防我地道我軍復力攻破之 十七日左宗棠督軍攻餘杭獲勝初宗棠由富陽輕騎赴餘杭檄諸軍會剿令魏喻義等列隊南門康國器列隊東門以掣賊勢羅大春由丁橋出西門大路楊昌濬由丁橋小路李耀南等繞出西北隅城賊悉衆來撲我軍分路禦之蔣益澧復遣馬步各營夾助賊忽由左路搶上山梁勢張甚楊昌濬從北路山峽突出衝殺賊始駭奔各軍蹙之水中殲斃無算 劉銘傳等攻常州城外賊

壘下之 二十四日程學啟克平望 二十五日賊犯鎮江馮
子材擊破之斬僞岡天義黃逆 二十七日潘鼎新等復海鹽
縣復分軍克沈蕩新豐鎮 二十八日程學啟劉秉璋吳毓芬
等收復嘉善縣 十二月初一日左宗棠軍攻杭州克賊壘九
座宗棠旣捷於餘杭益下令急攻杭州蔣益澧令高連陞偕洋
將德克碑會攻鳳山門各壘而親率馬步隊列錢塘門外秦亭
山棲霞嶺一帶牽制城賊高連陞等數路齊進壘賊揚旗出拒
連陞乘賊未陣猛撲之楊政謨水師沿江轟擊高連陞德克碑
大呼陷陣賊縮退石壘我軍躍踪追入破賊一壘盡殲之賊望
風逃竄自辰至午九壘皆克於是杭州城外只餘古塘賊壘及

近城兩壘未破益遵令高連陞分所部五營駐賊五壘德克碑駐賊二壘以逼之 初三日劉銘傳郭松林敗賊於奔牛鎮

二十五日楊昌濬康國器攻餘杭破賊壘四座斬闕天義李有慶 二十七日左宗棠軍收復海甯州僞會王蔡元隆降改名元吉 時金陵城中積糧未罄洪酋仍爲負隅死守之謀僞忠王李秀成勸洪酋棄城同逃不從秀成與僞侍王李世賢銳意竄江西 公疏稱自蘇州克復僞忠王卽帶數萬人援救金陵到城已近五十日尙未猛撲官軍營壘近聞忠逆以溧陽至饒景數百里處處乏食頗以裹糧急趨爲難又據鮑超來牘報稱侍逆將親率悍黨裹二十日糧蓄意由長興廣德甯國一帶上

犯江西先據產糧之區以俟忠逆續至臣竊計忠恃一逆既不能各保分地又不能苦援金陵計非自皖入江別無圖存之策查從廣德甯邑上竄江西約有兩路西路由旌德太平石埭以竄饒景東路由昌化淳安開化以竄玉山西路之防臣已派兵堅守涇旌太石青池六城東路之防必由新境經過臣已飛咨左宗棠沈葆楨分別扼守以期節節堵遏力保上游完區其金陵洪逆老巢賊氣尙固糧食未竭臣弟國荃日夜憂灼臣囑令不求速效但求穩慎以期仰副

聖主厯念南疆謀出萬全之至意

上是之

朱子大全卷之八

求闕齋弟子記卷九

東湖王定安撰

平寇六

同治三年正月初六日僞侍王李世賢僞堵王黃文金陷績溪縣 初八日浙江布政使蔣益澧收復桐鄉縣僞朝將何培章降 初九日唐義訓王開琳會克績溪縣 十四日唐義訓王開琳連捷於歙縣 時李世賢合股上犯蕪衝過徽州就食江西腹地我軍雖有績溪歙縣之捷而賊勢趨重遂安擾及開化之馬金街與休甯婺源常山玉山毘連公檄毛有銘由安慶渡江趨休甯江西巡撫沈葆楨檄席寶田守婺源韓進春守玉山

江右之防稍固 二十日湖州賊犯烏鎮雙橋營蔣益漴擊卻之 席寶田敗賊於婺源之規橋 二十三日韓進春敗賊於玉山之洋口 二十四日郭松林會洋將戈登克宜興荆溪二縣 蔣益漴遣蔡元吉克嘉興西門賊壘 二十五日左宗棠遣高連陞德克碑攻杭州望江門克石壘三座 公弟國荃攻克鍾山石壘金陵合圍金陵一城延亘百餘里自國荃駐師雨花臺奪取附城要隘東西南三面悉爲我有惟鍾山偽壘未克城北兩門尙未合圍國荃商之楊岳斌派彭楚漢丁泗濱師船雪夜巡江見奸民小划載米偷渡輒要而奪之以斷江西之接濟又派朱洪章熊登武羅雨春沈鴻賓蕭開印等營各出三成

隊繞鍾山後分夜輪擊以扼陸路之接濟然城北地面太寬僞天王洪秀全與僞忠王李秀成踞守老巢堅伏不動每乘雨夜搬運賊糧國荃調韋志俊五營渡江守金柱關騰出朱南桂等六營助圍金陵甫至三汊河值大雪連朝平地數尺人馬阻絕頓兵未發十六日始令陳萬合胡克安等由草鞋峽登岸朱南桂率黎冠湘彭維祥等繼進將移營城北二十日夜偵知僞忠二殿下李士貴率黨數千自太平門赴句容護糧進城朱洪章等潛約各營伏兵要路羣起截擊斬七百餘級執二百餘人棄糧阜積狼籍道左次日國荃親督朱南桂張詩日譚國泰梁美材等各率親兵振隊至洪山北固山神策太平等門外周歷形

勢詳勘營基適李秀成先由城中糾大股出鍾山之南猛撲嘉字營濠牆拔地籤躍躍欲上我營以槍砲憑牆環擊賊不少卻朱洪章武明良等見賊抵死來犯留兵守定營寨一面率隊出濠分路夾擊朱洪章羅雨春沈鴻賓等向右路武明良武文山等向左路蹇旂直前搏戰移時殲賊數百賊乃退走上山鍾山之巔有石壘僞名曰天保城羅雨春攀巖直上中槍幾墜沈鴻賓率哨弁繼至各挾其火毬火箭從壘後擲入賊多冒火突出各弁勇從砲眼中肉薄而登所遇輒殲出壘之賊又經朱洪章武明良等四出抄殺無一得脫者立將鍾山石壘克復以長勝營四哨守之二十二日賊又兩次來撲國荃撥軍擊退遣黃潤

冒熊上珍移駐山嶺分戍天保城二十四日派蕭孚泗蕭慶衍
馬步十二營出山北列隊太平門外護修二壘以王遠和等守
之維時梁美材所部紮洪山朱南桂所部紮北固山堵住神策
門大路僅餘元武湖一段無兵分駐然隔水甚寬援賊不得入
城賊不得出於是金陵城北之圍始合 公疏稱曾國荃屯兵
金陵苦苦守戰將近兩年始將城外數十石壘全數攻克抄過
北路以成四面包舉之勢其踞城百里之外如鎮江東壩溧水
金柱關均有重兵駐守宜興溧陽二縣又新經蘇軍克復外援
將絕糧米無多仰仗

聖王威福如果克此堅城當不至有大股逸出貽患他方惟是

圍師不滿五萬分布九十餘里偏困數十萬賊深慮窮寇衝突
抵隙蹈瑕譬之堵塞河決合龍固屬可喜走掃亦復可虞每念
臣弟國荃才力淺薄荷此重任臣尤惴惴如履春冰

上諭曾國荃親督諸將攻破鍾山石壘奪回天保僞城金陵城
北之圍自此始合所辦甚合機宜惟是官兵不滿五萬分布地
段太長深慮困獸猶關亟思一逞曾國荃穩慎進攻晝夜嚴防
必須就地殄除毋任竄突他處以竟全功而膺懋賞 是月陝
西巡撫劉蓉克漢中府暨城固洋縣初僞扶王陳德才糾合捻
匪踞漢中僞天王洪秀全因金陵圍急遣謀告援劉蓉偵賊將
東遁遣何勝必蕭慶高等督軍急攻初十日破法慈院賊巢十

一日劉蓉遣曾堯曾克勝等破油房街賊壘直薄漢中府賊洶懼圖竄我軍斬關而入遂克其城十六日何勝必劉岳曙蕭慶高等毀上元觀賊壘進攻城固洋縣皆下之陳得才竄南陽襄陽遂合捻衆犯棗陽成大吉等擊卻之其藍二順一股由山陽竄鄖陽之上津堡唐協和等復擊走之二月初二日郭松林收復溧陽縣賊酋吳人杰降初三日郭松林進軍金壇敗僞劉王襄王於楊巷追至金壇南門初五日盡燬金壇城外賊壘都司張榮魁死之初九日席寶田克金谿縣十六日劉銘傳等大捷於常熟十八日提督程學啟克嘉興府因傷卒於軍學啟攻嘉興急以洋礮毀城垣百餘丈賊負土堵城學啟揮旂

詭欲登城俟賊益聚乃然礮中賊輒斃數百賊亦鑿城根實砲於中以拒我而湖州賊僞堵王黃文金由新厓犯我後學啟遣張家瑜等擊走之城賊漸不支學啟促將士梯而登死者相枕籍學啟憤躍逾浮橋肉薄登城槍子中左腦昏絕昇歸營其下益裹創冒死爭進賊始亂潘鼎新劉秉璋率水陸登城城乃破學啟創重歸蘇州旋卒學啟安徽桐城人擄於賊僞英王陳玉成重之不爲用咸豐十一年由安慶逸出投公弟貞幹營旋隨公弟國荃破安慶學啟功頗多李鴻章之至上海也公遣學啟隨之東所向皆捷每赴敵迅疾賊畏之目爲神軍及歿士民痛惜洋將戈登久與學啟同行陣相推服及誅蘇州降酋戈登不

懌不復與學啟相見聞其死乃泣下以學啟督戰時二長旗攜歸其國以爲念其見重於外夷如此學啟旣卒

上悼惜

贈太子太保

予諡忠烈安慶蘇州俱建祠 二十四日左宗棠軍攻克杭州省遂克餘杭縣先是僞聽王陳炳文遣族兄陳大桂赴蘇州乞降事忽中變左宗棠遣陳大桂入杭州諭令獻城散衆迄無耗二十二日宗棠飭蔣益澧率水陸諸軍分路進攻克古蕩觀音塘堅壘十座又令德克碑於饅頭山放炸炮毀鳳山門城垛數丈我軍及洋兵奮勇登城傷亡百餘名二十三日益澧遣徐文

秀等攻十里街劉清亮等擊武林門援賊劉清望等攻錢塘門高連陞德克碑等攻鳳山門王月亮等攻清波門劉連陞等率水師登岸分攻望江清泰兩門益禮自率親兵往武林門督戰徐文秀等銜枚疾進至十里街旁拔木椿竹籤越濠而進賊伏壘內排礮轟擊徐文秀執小旗冒礮躍進內濠周廷瑞等接踵而上賊死拒不退我軍屢登屢蹶徐文秀足受矛傷各勇益奮僞聽王陳炳文率悍黨萬餘來援劉清亮王東林席得元等分投堵擊賊稍卻時周廷瑞等奮攻賊壘勢已垂破城中又出賊數千益禮飭洋鎗隊緊逼城門天忽大雨我軍仍嚴陣以待雨止復攻直至酉刻收隊是夜四鼓陳炳文潛啟武林門遁逸益

澧先伏軍城根間城中柝聲漸稀忽人聲鼎沸知賊將他竄徐文秀等分兩大隊由武林錢塘等門衝殺而入益澧督親兵繼之人馬紛馳尸骸枕籍呼聲震數里而高連陞德克碑王月亮劉連陞等各率所部由鳳山清波清泰慶春等門梯城而入拔出難民無數遂於二十四日卯刻復其城而康國器等亦於是日攻克餘杭縣賊酋汪海洋遁至瓶窑我軍復擊走之捷聞上諭閩浙總督左宗棠自督辦浙省軍務以來連克各府州縣城池茲復將杭州省城餘杭縣城攻拔實屬調度有方著加恩賞加太子少保銜並賞穿黃馬褂浙江布政使蔣益澧自調任浙江以來戰功卓著屢拔堅城實屬奮勇異常著穿黃馬褂以

示優獎其餘出力人員論功給獎有差又

諭杭州敗匪竄回德清餘杭敗匪亦竄踞瓶窰鎮左宗棠旣須
剿辦瓶窰之賊又須赴杭城布置兼須進剿湖郡用兵處所甚
多且距浙省邊界漸遠所有浙江及江西交界邊防著曾國藩
左宗棠會商兼顧嚴斷賊匪竄越之路斷不可爲其所乘致掣
全局 時金陵賊糧漸罄僞天王洪秀全日放婦孺出城以節
食僞忠王李秀成以無米告秀全信方士沈某之言以草上有
露謂草爲甜露責每戶繳甜露十擔告衆曰闔城食甜露可以
養生吾且先食之衆雖知其誕而無可如何乃於城內種麥冀
濟飢公弟國荃屢以雲梯猛攻未克公囑國荃力扼要隘勿求

急功因疏稱今蘇浙之省會已克金陵之長圍已合論者謂大功指日可成元惡指日可斃以臣觀之洪酋與忠逆堅悍非常屢掘地道俱未得手城中新種麥禾新黃彌望臣之愚計敦囑曾國荃鮑超等總須力扼竄路不使逆酋挾大股衝出貽患他方至克復之遲速尙難預料往昔庚申之春和春張國樑大軍合圍功敗垂成彼時圍師比今日多二萬人餉項存營者尙數十萬徒以遲延未發尙爲軍士藉口全局決裂况今日餉項奇絀朝不謀夕此臣之隱衷外人詫爲過慮者也 是月西安將軍多隆阿克整厘縣 三月初四日楊昌濬克武康縣 初五日蔣益澧克德清縣僞歸王鄧光明以石門縣降 初七日鮑

超克句容縣句容守賊僞守王方海宗聞超將至糾合金壇寶
壇守賊僞翰王項大英僞列王方成宗同守句城超冒雨疾馳
行過溧水攻三岔賊卡破之初六日軍次塔岡距句容十里城
中出賊三四萬衆密布山岡超分軍迎敵忽見城東火光燭天
知賊內變引軍東向賊敗南門遁逸次日黎明入收其城擒賊
酋項大英方成宗檻送公營誅之遂克寶壇賊壘方海宗遁入
金壇 賊酋陳炳文汪海洋分道犯徽州唐義訓毛有銘迎戰
於楊村敗績於是嶺內徧地皆賊徽休祁黟岌岌難保賊前隊
由龍灣婺源竄江西後股續至者絡絡不絕公訓石埭二營青
陽四營入嶺援徽而檄鮑超率全軍援江西因疏稱疊奉

諭旨垂詢臣往金陵督辦剿賊目下徽境賊勢如此浩大上游無所秉承臣不宜前赴金陵顧彼失此所有金陵圍師仍責成曾國荃一手經理圍師諸將中有蕭慶衍部下之亨字營開餉曾國荃憂惶無計臣覆函囑其欠餉大久不可過繩以法只宜多方撫慰藏此一簣之功又囑其不可令大股衝出貽患他方萬一金陵幸克卽由曾國荃彭玉麟楊岳斌三銜將大概情形先行馳奏以慰

聖懷 二十日鮑超收復金壇縣 二十三日欽差大臣西安將軍多隆阿因傷卒於盤屋軍多隆阿攻盤屋時頭目受鎗子傷甚重忍傷回營諸將趨視多隆阿謂之曰此城速克傷重亦

可痊如不乘城雖輕亦不欲活諸將皆感憤再戰下之而多隆
阿創重不可治矣多隆阿由黑龍江馬隊從征皖楚料敵之神
莫與倫比同治元年秋銜

命入秦以親兵七千人解商南之圍又以四營破捻匪姜台凌
五六萬之衆伏尸四十里山前巨壑窈不見底人馬層積填與
路平

朝廷稱爲奇捷尤善拊循士卒令下如流水雖湯火不敢避及
卒三軍感泣方受傷時

上發內府珍藥敷治並

命黑龍江將軍傳知其子雙全馳驛往視多隆阿窮無居室其

子依親串身無完衣黑龍江將軍伙助始成行及至已不及見其公爾忘家如此公嘗稱多謀鮑勇而尤贊多之號令節制爲不可及云 二十五日公弟國荃攻金陵月圍破之國荃圍金陵久掘地道於朝陽神策金川各門外賊於附城一帶築月圍以拒之國荃督軍攻破月圍焚其火藥殲賊無數我軍傷亡亦近三千人 是月江西巡撫沈葆楨克新城縣進圍南豐 僞扶王陳得才由浙川內鄉鄧州竄至李官橋與捻匪合股衆數十萬犯棗陽 四月初六日李鴻章克常州府初鴻章至常州督諸軍攻城時城西賊營猶二十里夾運河左右環列鴻章令劉銘傳攻西北賊六營盡破之郭松林楊鼎勳攻陳渡橋賊八

營又破之餘十營皆潰張樹聲鄭國魁周盛波等會擊河干賊二十餘營又盡平之於是賊西道皆絕惟小南門西門附城十餘營官軍復擊破之賊酋陳坤書恐官軍躡敗賊入城閉門拒不納悍賊盡死城下乃合圍三月二十二日壞城垣數十丈遣死士樹梯登坤書率悍賊悉力堵缺口火藥雜磚石俱下官軍與賊皆死枕籍會天雨弗克鴻章益繕攻具築長牆伏奇兵出擊顧久雨不霽至是月初六日加午天大霽反風煙焰撲城頭水陸礮聲發如雷舊壞城復傾數十丈賊以人塞缺口直炸礮則手足旂幟輒石紛激起天際然旋死旋集終不退鴻章益揮軍登城郭松林王永勝劉士奇接刃趨隊攜藤牌噴筒薄城賊

傾火藥以長矛格刺軍士十墜六七不顧卒擁而登接刃戰城頭久之賊始潰坤書率僞烈王費天將巷戰松林生擒坤書周盛波擒費天將劉銘傳令於城棄械者免於是跪而降者萬人官軍亦亡千餘人常州以咸豐十年四月初六日陷越四年而復月日時皆不爽亦奇矣 初八日富明阿馮子材收復丹陽縣 十四日鮑超擊賊於丹陽大破之 常州敗賊竄徽州唐義訓毛有銘金國琛截擊破之餘匪竄江西公以徽州失利自請嚴議奉

旨寬免 二十六日左宗棠遣王德榜擊賊於弋陽湖西僞列王林彩新溺斃餘賊殲焉 於是僞侍王李世賢僞康王汪海

洋偽聽王陳炳文先後由安徽休歙祁門績溪等縣分竄江西
公檄鮑超自句容赴援以劉銘傳屯句容鄭國魁屯東壩周盛
波屯溧陽之南渡定埠

詔福建水師提督楊岳斌督辦皖南江西軍務 是月沈葆楨
遣劉于濤等援撫州賊解圍遁 僧親王擊髮捻各匪於隨州
獲勝 五月

上以金陵功在垂成髮捻蓄意東趨恐掣動全局飭李鴻章調
勁旅數千及得力砲隊前赴金陵會合曾國荃相機進取 公
疏言蘇常克復之後臣本擬咨請李鴻章親來金陵會剿特以
該撫係封疆將帥之臣又值苦戰積勞之際非臣所敢奏調因

詢臣弟國荃亦以師久無功不敢更求助於人近於畏難劄責始勤終怠者之所爲乃兩月以來百計環攻傷亡至四千餘人所挖地道已被該逆從內掘出三洞此外諸洞亦難奏效而曾國荃焦勞致疾飲食漸減餉項奇窘尤爲可慮臣已恭錄

諭旨加函催請李鴻章親來金陵使僅派將前來其知者以爲憐該撫之過勞信蘇將之可恃不知者以爲臣弟貪獨得之美名忌同列之分功尤非臣兄弟平日報

國區區之意旋兩次奉

諭旨催李鴻章助攻金陵時李鴻章所部滬軍協攻湖郡分防句容東壩高淳溧水等處兵力難分常勝軍及程學啟所遺礮

隊並劉銘傳砲隊或派往長興或訓練未成李鴻章疏請俟湖
郡克復再行協攻金陵

朝廷欲激會國荃迅速成功仍屢催之 公疏言臣自旬日以
來懋奉

寄諭殷殷指示不外迅剿金陵及皖北江西兩路軍務所有近
日籌辦情形理合分晰詳對馳慰

宸廑如

諭旨飭令李鴻章統率諸軍助攻金陵一節臣接李鴻章來咨
教練砲隊尙須時日又以湖州賊衆蘇常毗連會攻金陵卽不
能協剿湖州又謂天氣炎熱洋鎗連放卽紅多則炸裂開花砲

放至十數出卽不能著手等語係屬實在情形臣亦未便再三
責催轉瞬新秋暑退該撫必可督兵親來屆時湖郡或已先下
無復浙賊犯蘇之慮亦無鎗砲紅裂之患矣

諭旨詢及聞中外匪徒仍有偷濟賊中糧食軍火之事飭卽實
力嚴防一節查金陵城大而堅重山複港引河穿城接濟極不
易斷然自二月合圍以來陸路晝夜搜查據報已粒米不能入
城水路百計防範終難淨絕至四月底始定上下民船三日放
關一次均派砲船護送除放關有期外不准一船往來臣頃面
詢楊岳斌據稱五月以來江濱奸匪暗竇賊糧者實已絕蹤然
水路六百七十里臣何敢信其一無疎漏惟當諄飭各營加

意嚴防近聞戈登語及白齊文暗回中國招集無賴雇備輪船將赴金陵助濟逆酋此則意外之虞頗難防禦耳

諭旨以英霍喫緊去安慶不遠飭臣俟上游軍勢漸平卽赴金陵督師一節查賊之由鄂趨皖意在掣動金陵全局果能扼守皖境卽所以協助金陵臣前次奏明擬於六月親赴下游籌商攻剿現值鄂省各股竄近英霍新調桐城廬江無爲之兵均未到防安慶人心震動誠如

聖諭臣實未可輕離惟有催集防軍設法堵遏俟皖北稍安李鴻章會剿有期卽當馳赴金陵商辦一切

上諭據曾國藩奏稱曾國荃焦勞致疾餉項奇絀尤爲可慮等

語前據李鴻章將輪船經費五十萬兩解赴大營會國藩何時
收到卽行具奏會國荃積勞致疾聞之深爲慮念現在大暑炎
蒸該大臣卽傳知該撫善爲調攝金陵城大而堅賊悍且衆困
獸之鬪不可不防該撫務當拊循士卒嚴防竄突先爲不可勝
以待敵之可勝 二十三日李鴻章軍克長興縣 三十日公
弟國荃攻克龍膊子山石壘賊所稱地保城也我軍自得天保
城後城中防守益密地保城扼建要害百計環攻未下國荃遣
李祥和等攻克之遂築砲臺其上日發大砲擊賊居高臨下城
中形勢皆在掌握矣 是月賊酋陳德才馬融和合捻匪竄擾
孝感雲夢等縣護軍統領舒保陣亡 川匪藍二順犯西安省

劉蓉德興阿穆圖善等會擊破之 六月初四日左宗棠軍連
捷於湖州遂克孝豐縣 十六日公弟國荃攻克金陵僞都僞
幼主洪福瑱遁入廣德州生擒僞忠王李秀成及洪仁達等先
是四月二十七日僞天王洪秀全見勢窮援絕服毒身死羣酋
私瘞僞宮內秘不發喪而內外喧傳已遍乃立其子洪福瑱爲
幼主官軍自六月朔日輪流苦攻晝夜不息國荃度城內賊糧
足支數月我軍地道三十餘穴俱未奏功將士疲敝恐生他變
益誓師督戰飭李臣典率吳宗國等從賊礮極密之處重開地
道蕭孚泗黃潤昌熊登武王遠和等距城十餘丈築礮臺數十
令諸軍積濕蒿覆以沙土肉薄相逼死亡枕籍十五夜國荃率

李臣典親詣地道洞口指揮士卒埋藥忠酋李秀成突出死黨數百人由太平門傍城根直犯地道大壘別從朝陽門出數百人裝官軍號衣持火蛋延燒各礮壘及附近濕蘆蒿草官軍久勞之餘幾爲所乘伍維壽彭毓橘等左右分擊獲免十六日勦明國荃飭各營穩站牆壕嚴防沖突而另軍力攻太平門龍膊子一帶至午刻李臣典報地道封築口門安放引綫國荃懸不貲之賞嚴退後之誅各將士誓死報

國登時火發霹靂一聲轟開城垣二十餘丈煙塵蔽空磚石如雨李臣典等率官軍蟻附爭登直衝倒口而入賊以火藥傾盆燒我士卒大隊稍卻彭毓橘蕭孚泗等手刃數人由是弁勇無

一退者羣賊抵死巷戰我軍分路齊進王遠和王仕益朱洪章
羅雨春沈鴻賓黃潤昌熊上珍進擊中路攻僞天王府之北劉
連捷張詩日譚國泰崔文田等進擊右路由臺城趨神策門一
帶適朱南桂朱惟堂梁美材等亦從神策門地道之旁梯攻而
入兵力益厚直廕戰至獅子山奪取儀鳳門其中左路則彭毓
楠武明良等由內城舊址直擊至通濟門左路則蕭孚泗熊登
武蕭慶衍蕭開印等分途奪取朝陽洪武二門守陴之賊誅戮
殆盡而羅逢元等從聚寶門西舊地道缺口仰攻而入李金洲
等從通濟門月城緣梯而上陳湜易良虎等猛攻旱西水西兩
門月城僞忠王李秀成方率黨狂奔將向旱西門奪路衝出適

爲陳湜大隊所阻乃轉回清涼山隱匿民房黃翼升率水師攻奪中關攔江礮石壘乘勝至旱西門遂與陳湜易良虎等奪取水西旱西兩門由是全城各門皆破日已暝矣而賊猶守僞王城朱洪章與賊搏戰沈鴻賓等從左路捲旂疾趨僞城之東設伏出奇值洪章馬傷賊扼石橋我軍不能渡遂由僞城東逕遁而南三更時僞天王府及各僞王府同時舉火突出悍賊千餘人手執洋鎗向民房街巷而走其時僞城火已燎原不可嚮邇其僞官女縊於前苑內者不下數百人死於城河者不下二千餘人奪獲僞玉璽二方金印一方僞幼主洪福瑱率死黨二千餘人乘官兵夜戰之時由缺口遁走國荃傳令閉城分段搜殺三

日夜火光不絕斃賊十餘萬人凡僞王僞主將天將及大小酋目約三千餘名死於亂兵之中居其半死於水火者居其半十九日提督蕭孚泗搜獲僞王兄洪仁達僞忠王李秀成等於是派營救火掩埋賊屍拔出難民數十萬人公弟國荃馳驛報捷上諭楊岳斌彭玉麟會國荃馳奏克復金陵大概情形一摺逆首洪秀全等以數十萬逆衆久踞金陵負嵎死守會國荃等督師圍攻所部不滿五萬兩載以來將城外賊壘悉數掃盪茲於炎風烈日之中傷亡枕籍之餘併力猛攻克拔堅城非會國藩調度有方會國荃及各將士踴躍用命不能建此奇勳披覽之餘曷勝欣慰此次立功諸臣將僞城攻破巨憝就擒卽行渥沛

恩施同膺懋賞其洪秀全及著名巨酋必須悉數擒獲毋使免脫此外被脅難民仍著設法安插以示寬大之仁金陵巢穴已覆各路餘匪自必聞風喪膽著左宗棠李鴻章乘此聲威迅克湖郡楊岳斌計已行抵南昌卽著迅將江右逆氛掃盪俾東南數省咸就肅清登吾民於衽席有厚望焉公以大功不易居乃讓湖廣總督官文居首連銜入

告畧云臣等伏查洪逆倡亂粵西於今十有五年竊據金陵亦十二年流毒海內神人共憤我

朝武功之盛超越前古屢次削平大難焜耀史編然如嘉慶川楚之役蹂躪僅及四省淪陷不過十餘城康熙三藩之役蹂躪

尙止十二省淪陷亦三百餘城今粵匪之變蹂躪竟及十六省淪陷至六百餘城之多而其中凶酋悍黨如李開方馮官屯林啟容守九江葉芸來守安慶皆堅忍不屈此次金陵城破十餘萬賊無一降者至聚衆自焚而不悔實爲古今罕見之劇寇然卒能次第蕩平剿除元惡臣等深惟其故蓋由我

文宗顯皇帝盛德宏謨早裕戡亂之本

官禁雖極儉嗇而不惜巨餉以募戰士名器雖極慎重而不惜破格以獎有功

廟算雖極精密而不惜屈己以從將帥之謀

皇太后

皇上守此三者悉循舊章而加之去邪彌果求賢彌廣用能誅
除僞僭蔚成中興之業臣等忝竊兵符遭逢際會旣慟我
文宗不及目覩獻誠告成之日又念生民塗炭爲時過久惟當
始終愼勉掃盪餘匪以蘇子黎之困而分

宵旰之憂疏入

上諭本日官文會國藩由六百里加緊紅旗奏捷克復江甯省
城一摺覽奏之餘實與天下臣民同深嘉悅髮逆洪秀全自道
光三十年倡亂以來由廣西竄兩湖三江並分股擾及直隸山
東等省逆蹤幾遍天下咸豐三年佔踞江甯省城僭稱僞號東
南百姓遭其荼毒慘不忍言罪惡貫盈神人共憤我

皇考文宗顯皇帝赫然震怒恭行天罰

特命兩湖總督官文爲欽差大臣與前任湖北巡撫胡林翼肅
清楚北上游胡林翼駐紮宿松一帶籌辦東征復

特授曾國藩爲兩江總督並

命爲欽差大臣東征江皖號令旣專功績日著十一年七月我
皇考龍馭上賓其時江浙郡縣半就淪陷

遺詔諳切以未能迅殄逆氛爲憾朕以冲幼寅紹丕基祇承
先烈恭奉

兩宮

皇太后垂簾聽政

指示機宜授曾國藩協辦大學士節制四省軍務以一事權該大臣自受任以來卽建議由上游分路剿辦飭彭玉麟楊岳斌曾國荃等水陸並進疊克沿江城隘百餘處斬馘外援逆匪十數萬人合圍江甯斷其接濟本年六月十六日曾國荃率諸將克復江甯外城殺賊數萬逆首仍踞內城抵死抗拒三更時僞天府及各僞王府同時火起洪逆衝出僞殿前南門竄至民房四更外賊股千餘人假裝官軍號衣向太平門缺口衝出經曾國荃加派馬隊追至純化鎮生擒僞烈王李萬材據曾國荃親訊李萬材供稱城破後僞忠王之兄巨王幼西王幼南王定王崇王璋王乘夜衝出被官軍馬隊追及將各頭目全行殺斃

又據城內各賊供稱首逆洪秀全實於本年五月服毒而死瘞於僞宮院內僞幼主洪福瑱重襲僞號李秀成一犯城破受傷匿於山內民房經蕭孚泗親自搜出並被擒僞王次兄洪仁達其餘兩廣兩湖等處多年悍賊經各將士於十七八日搜殺淨盡三日之內斃賊十餘萬人僞王僞主將僞天將及大小酋日三千餘名無一得脫者此皆仰賴

昊蒼眷佑

列聖垂庥

兩宮

皇太后孜孜求治識拔人材用能內外一心將士用命成此大

功上慰

皇考在天之靈下孚薄海臣民之望自惟藐躬涼德何以堪此
追思

先皇未竟之志不克親見成功悲愴之懷何能自己此次洪逆
倡亂粵西於今十有五年竊據金陵亦十有二年蹂躪十餘省
淪陷六百餘城卒能次第蕩平殄除元惡該領兵大臣等櫛風沐
雨艱苦備嘗允宜特沛殊恩用酬勞勩欽差大臣協辦大學士
兩江總督會國藩自咸豐三年在湖南首倡團練創立舟師與
塔齊布羅澤南等屢建殊功保全湖南郡縣克復武漢等城肅
清江西全境東征以來由宿松克潛山太湖進駐祁門疊復徽

州郡縣遂拔安慶省城以爲根本檄水陸將士規復下游州郡
茲幸大功告蒞逆首誅鋤實由該大臣籌策無遺謀勇兼備知
人善任調度得宜會國藩著賞加太子太保銜錫封一等侯爵
世襲罔替並賞戴雙眼花翎浙江巡撫會國荃以諸生從戎隨
同會國藩剿賊數省功績頗著咸豐十年由湘募勇克復安慶
省城同治元二年連克巢縣含山和州等處率水陸各營進逼
金陵駐紮雨花臺攻拔僞城賊衆圍營苦守數月奮力擊退本
年正月克鍾山石壘遂合江甯之圍督率將士鏖戰開挖地道
躬冒矢石半月之久未經撤隊克復全城殄除首惡實屬堅忍
耐勞公忠體國會國荃著賞加太子少保銜錫封一等伯爵並

賞戴雙眼花翎記名提督李臣典於鎗砲叢中搶挖地道誓死滅賊從倒口首先衝入衆軍隨之因而得手實屬謀勇過人著加恩錫封一等子爵並賞穿黃馬褂賞戴雙眼花翎蕭孚泗督辦炮臺首先奪門而入並搜獲李秀成洪仁達巨逆實屬勦勞卓著著加恩錫封一等男爵並賞戴雙眼花翎其餘文武一百二十餘員論功進秩有差又

論軍興以來各路統帥疆臣公忠體國共濟時艱現在紅旗報捷東南軍務即可從此底定各路統帥疆臣允宜特加異數以昭恩渥於是欽差大臣科爾沁親王僧格林沁加賞一貝勒欽差大臣大學士湖廣總督官文錫封一等伯爵世襲罔替並將

本支內務府旗籍擡入正白旗滿洲賞戴雙眼花翎江蘇巡撫
李鴻章錫封一等伯爵賞戴雙眼花翎陝甘總督楊岳斌兵部
右侍郎彭玉麟均賞給一等輕車都尉太子少保銜四川總督
駱秉章賞給一等輕車都尉雙眼花翎浙江提督鮑超賞給一
等輕車都尉西安將軍都興阿江甯將軍富明阿廣西提督馮
子材均賞給騎都尉署京口副都統魁玉賞給雲騎尉漕運總
督吳棠賞給頭品頂戴惟閩浙總督左宗棠杭州將軍國瑞江
西巡撫沈葆楨但奉

優旨褒獎俟浙江江西肅清再行加恩

上諭樞臣曰粵逆久踞江南負嵎抗拒實爲從來未有之悍寇

此次水陸各軍於溽暑炎蒸之際猛力環攻迅克堅城悍黨悉除渠魁就縛非曾國藩運籌決策督率有方曾國荃等躬冒矢石鼓勇先登末由建此奇功成乃不續朝廷嘉悅之懷實難盡述除曾國藩等已加恩錫封外其出力員弁兵勇並著查明保奏候旨施恩發去銀牌四百面著曾國藩曾國荃等擇其功績最著者先行頒給以勵戎行各路賊匪皆視金陵爲趨向此時巢穴旣覆其餘竄逸之匪自必聞風喪膽逆首李秀成洪仁達等均係內地亂民不必獻俘第該逆等罪惡貫盈自應檻送京師審明後盡法懲治以洩神人之憤

上以洪逆竄陷江甯省城竊據者十有餘年百姓遭其荼毒或

被賊襲脅而鋒刃頻罹或轉徙他鄉而溝壑難免蚩蚩何辜罹此殘酷著曾國藩李鴻章查明江甯地方應徵錢漕分別蠲緩俟旨施恩 二十四日公由安慶御輪船東行二十五日至金陵慰勞將士二十八日巡視城垣二十九日掘洪秀全尸於偽宮中戮而焚之 七月初二日一等子記名提督李臣典卒於軍臣典邵陽人樸實忠勇從公弟國荃居前敵閱九年每遇危險慷慨赴敵或以身翼蔽主將有古名將風因攻金陵在地洞受傷不肯服藥遂卒年纔二十七迨

錫封下不克親拜

寵命聞者惜之 初四日設善後局賑難民 公親訊逆酋李

秀成洪仁達洪仁發等秀成書親供四萬餘字歷述賊中興敗始末冀貸一死公以該逆罪大駢戮之因疏陳處治逆酋粗籌善後事宜畧云臣抵金陵周歷各營接見諸將均有憔悴可憐之色蓋自五月三十日攻破地保城後連攻十五晝夜但出行隊未支帳棚晝則日炙宵則露處又出入地洞之中面目黧黑雖與臣最熟之將初見幾不相識其論功最首之李臣典因冒暑受傷一病不起諸將亦傷病山積死亡相屬臣弟曾國荃前病業已痊愈近因隨衆露處過久又復偏發濕毒臣帶兵多年克城數十罕見如此次之勞苦者臣宣道

皇仁多方撫慰旣獎其可憫可敬之功復勗以忘死忘勞之義

至僞天王洪秀全逆尸將士積積之餘皆欲得而甘心直至六月二十七日始從僞宮內掘出二十八日扛至營次臣與臣弟國荃驗看臣所帶委員中有曾任刑部秋審處之勒方綺廳際雲孫尙絃等暨各文武公同相驗該逆尸遵尙邪教不用棺木徧身皆用繡龍黃緞包裹雖袴腳亦係龍緞頭禿無髮鬚尙全存已間白矣左股有膀肉猶未脫驗畢戮尸舉烈火而焚之有僞官婢者係道州黃姓女子卽手埋逆尸者也臣親加訊問據供洪秀全經年不見臣僚四月二十七日因官軍攻急服毒身死秘不發喪而城內羣賊城外官兵喧傳已徧十餘日始行宣布等語僞幼主洪福瑱繞室積薪爲城破自焚之計衆供皆合

連日在僞宮灰燼之中反復搜尋茫無實據觀其金玉二印皆在巷戰時所奪取又似業已逃出僞宮者李秀成之供則稱曾經挾之出城始行分散然此次逃奔之賊僅十六夜從地道缺口逸出數百人當經騎兵追至湖熟圍殺淨盡自十七日後會國荃卽將缺口封砌關閉各城搜殺三日洪福瑱以十六歲童駭縱未斃於烈火亦必死於亂軍當無疑義所有僞玉璽二方金印二方當專差齎送軍機處俾方畧館有所考焉李秀成之被擒也各營之降卒附城之居民人久皆識觀者如堵臣甫至金陵親訊一次旋派委員鞠訊累日令寫親供多至數萬字敘髮逆之始末述忠酋之戰事甚爲詳悉臣復詢以江西李世賢

湖北馬融和湖州黃文金各股賊情據李秀成供湖州廣德之賊卽可不攻自退馬融和一股本由陝西調援金陵因長江阻隔久無來信李世賢係李秀成堂弟與之約定八月以前則擄江西之糧以救侍逆之飢八月以後全數回竄圖解長圍則擄甯國之糧以救金陵之饑等語又力勸官兵不宜專殺兩廣之人恐粵匪愈孤逆黨愈固軍事仍無了日其言頗有可采日來在事文武皆請將李秀成檻送京師卽洋人戈登威妥瑪等來賀者亦以忠逆解京爲快臣竊以爲

聖明天威滅此小醜除僭號之洪秀全外其餘皆可不必獻俘陳玉成石達開既有成例可援且自來元惡解京必須誘以甘

言許以不死李秀成自知萬無可追在途或不食而死或竄奪而逃翻恐逃顯戮而貽巨患臣與臣弟國荃熟商意見相同又李逆權衡要結頗得民心城破後竄匿鄉間鄉民憐而匿之蕭孚泗生擒李逆之後鄉民竟將親兵王三清捉去殺而投諸水中若代李逆報私忿者李秀成既入囚籠次日又擒偽松王陳德風到營一見李逆卽長跪請安臣聞此二端惡其民心之未去黨羽之尙堅卽決計就地正法以絕後患遂於初六日行刑其洪仁達一犯係洪秀全之胞兄與其長兄洪仁發皆暴虐恣橫多行不義爲李秀成所深恨且如醉如癡口稱天父不絕無供可錄因其抱病甚重已於初四日先行處死矣奉

旨所辦甚是著卽將洪李二逆首級傳示被擾地方以快人心而儆凶頑 楊岳斌遣鮑超破賊於撫州許灣斬賊四萬 十一日鮑超克復東鄉金谿兩縣 十二日楊岳斌遣江忠朝等克復崇仁宜黃兩縣 十三日公札撤湘勇二萬五千人留一萬人防守金陵留萬五千人爲皖南北游擊之師 十七日巡視貢院榜示金陵房屋章程八條 二十五日楊岳斌遣鮑超克南豐新城二縣 二十七日浙軍蘇軍會克湖州府湖州西南倚叢山東北多水道險固可守故趙景賢搆拒賊中而陷亦獨後僞堵王黃文金猶擁衆十萬踞之浙師旣克孝豐遂進安吉左宗棠方注意安吉圖截賊竄道並令總兵高連陞王月亮

降將蔡元吉鄧光明等進湖州東南五月初攻克菱湖東林山
進營妙喜鎮李鴻章以蘇湖接壤命郭松林楊鼎勳屯長興吳
毓芬屯夾浦口爲湖西之師松林分軍會潘鼎新屯平望吳淞
南潯爲湖東之師浙師蔡元吉方軍長超山賊圍攻之急布政
使蔣益澧面屬潘鼎新攻晟舍鼎新以炸礮隔水擊壞其營賊
布椿水中鼎新以小火輪船駛入盡拔其椿浙軍張景渠亦出
師次第毀其石壘乃大破之而湖州之西呂山尹隆橋大德橋
皆達四安廣德之地劉士奇王承勝楊鼎勳郭松林皆率師進
扼與賊隔水而軍賊先於尹隆橋立十數營臨橋築石卡圍以
月牆外濠二重引河水灌之可滅頂我軍亦築長牆置炸礮毀

其月牆七月二十日賊自尹隆橋至白龍洞表延二十餘里來犯郭松林令易用剛迎賊自督李長樂等斷後劉士奇王永勝由呂山夾擊擒斬數千人二十六日夜郭松林等敗賊於大德橋盡破沿山賊壘劉士奇率所部移屯焉廣德四安之道遂絕二十七日城賊傾巢出爭郭松林等約東路軍疾攻城分伏六營於尹隆橋八字橋河干伺之黃文金挾悍賊數萬至勢甚驟郭松林率水師迎其左王永勝由山徑迎其右黃文金袒而銜刀狂突數四槍破密格之不得前我軍益奮呼斫賊乃反奔潘鼎新遂會浙軍克府城賊酋黃文金猶逸去二十八日公回至安慶

楊昌濬周廷瑞克安吉縣斬僞駙馬列王徐朗餘賊

竄入廣德州 二十九日劉銘傳克廣德州城先是偽昭王黃文英方挾偽幼主洪福瑱踞廣德問銘傳軍至挾福瑱出走甯國山中餘賊猶迎拒銘傳追至廣德西門賊由南門逸遂收其城 是時江蘇浙江漸次肅清惟江西皖楚尙有餘匪公旣撤湘勇二萬五千人而

朝意恐散勇嘯聚爲亂御史陳廷經條陳勇補兵額

寄諭乖詢公前後具疏畧云臣初到金陵擬令將士休息一月卽派剿廣德等處乃諸將盛暑鏖兵病者甚多紛紛稟請撤勇回籍臣以皖浙未靖本不欲遽撤多督惟念近歲以來但見增勇不見裁撤無論食何省之餉所吸者皆斯民之脂膏所損者

皆

國家之元氣前此賊氛方熾萬不得已屢募屢增以救一時之急今幸老巢旣破大局粗定裁一勇卽節一勇之糜費亦卽銷無窮之後患諸將之願遣散歸籍蓋未始非臣之幸未始非大局之幸臣弟曾國荃困憊殊甚徹夜不寐有似怔忡據稱心血過虧欲請回籍調理一面親率遣撤之勇部勒南歸求可爲善聚不如善散善始不如善終之道湘勇召募之初選擇鄉里農民有業者多無根者少但使欠餉有著當可安靜回籍不至別生枝節至挑補兵額之說近多建此議者臣竊不以爲然蓋勇丁之口糧一倍於馬兵三倍於守兵馬糧之缺極少守糧月支

一兩不足供衣食之需誰肯於數千里外補一衣食不敷之缺欲以湖南樸實之勇補三吳綠營之兵必不情願其願補者皆游惰無歸者也臣愚以爲勇則遣回原籍兵則另募土著各返本而復始庶爲經久可行之道奉

旨如議辦理 八月初一日湖州餘賊竄甯國劉松山迎擊於錢村鋪降四千餘人賊竄歙縣初七日唐義訓易開俊夾擊大敗之擒斬三千有奇開俊乘勝逐北連捷於六甲嶺胡須嶺等處義訓連捷於豹嶺佛嶺鎮口等處殲首目九人僞幼孝王斃焉 左宗棠軍擊賊於昌化淳安之境大破之賊酋黃文金譚體元伏誅初僞幼主洪福瑱僞堵王黃文金僞祐王李遠繼僞

昭王黃文英僞忠王之子李士貴由甯國縣趨昌化之白牛橋
僞偕王譚體元僞樂王之子莫桂先僞首王范汝增等由甯國
趨淳安之威坪約同竄徽境衆尙十數萬初三日分水守將劉
光明擊黃文金於白牛橋文金先數日中礮至是傷重死賊摧
敗屋三間瘞之弟文英代領其衆踉蹌西奔初八日宗棠部將
黃少春斬譚體元於洪橋頭並誅莫桂元等酋一百五十餘名
初十日宗棠部將劉明珍率部由淳安而上值黃文英李遠繼
分路來撲明珍偕魏喻義李耀南劉明燈等分兵禦之誅文英
於馬下遠繼挾洪福瑱遁至徽歙之交十五日賊由建口淺涉
而渡我軍乘其半濟擊之賊大潰斬僞列王卽國文等斃賊無

數於是環跪乞降者六千餘人餘匪向績溪而逸其已渡建口
河者竄至遂安黃少春等復擊走之僞列王劉得義蕭雅泗等
率二萬人投誠福瑱勢益孤乃由遂安昏口遁至開化遂竄入
江西廣信境浙江平 於時金陵克復歷兩月

朝旨垂詢善後事宜甚多公分條覆奏其一江甯省城賊踞最
久居民流亡殆盡此次官軍克復羣酋縱火焚燒昔年巨室富
家改造僞府微有存者此外民房極少街市尙未復業臣當至
貢院履勘一次號舍一萬六千餘間尙完好惟監臨王考房官
及各所片瓦無存現經委員廣集工匠趕緊興修擬於十一月
舉行鄉試庶冀士子雲集商民亦可漸次來歸矣其一駐防旗

營亟宜修理擬俟貢院工竣次修江甯旗營次修京口旗營工作有先後之分庶籌辦有措手之處昔歲賊陷金陵旗營三萬餘人幾同一燼被害之慘甚於京口殉節之烈甲於天下十餘年來陸續增添現存不過八百餘人籌餉甚易爲力至挑閒散京旗以實江甯兵額亦俟修蓋營房規模粗定續奏辦理其一御史陳廷經條陳疆域畧爲變通臣查蘇皖未分之時跨江淮而爲省古人經畫疆里具有深意我

朝

聖君賢相未嘗輕議更張若必畫江而分南北兩省則亦宜畫淮而爲南北兩界淮北如蘇之徐州皖之潁州將割隸何省乎

唐之十道宋之十五路其於江南江北皆截然分而爲二與該御史所奏大指畧同然唐自中興以後聲教不行於河北宋自中興以後號令並不行於江北畫疆太明未必果能久安論形勢控扼之道守江南者必須先固淮甸棄淮則江南不可保昔人如吳師道胡安國楊萬里暨趙范葉適輩言之詳矣臣愚以爲疆吏苟賢則雖跨江跨淮而無損於軍事吏事之興疆吏苟不賢則雖畫疆分治而無補於軍事吏事之廢此等大政似不必輕改成憲奉

旨如議 公又疏稱今金陵克復大功組成臣兄弟叨竊異數前後文武各員無不仰荷

殊恩追思昔年患難與共之人其存者惟李元度抱向隅之感其沒者尙有數人懷不暝之恨臣均對之有愧不得不畧陳

二上干

聖聽李元度從臣最久艱險備嘗遠近皆知其十年守徽之役到郡不滿十日僞侍王大股猝至兵力未厚府城失陷臣奏參革職拿問其十一年援浙之役參案未結遽行回籍臣奏參革職留營議者皆謂失之太嚴而內省尙不甚疚所最疚者當咸豐六年之春臣部陸軍敗於樟樹江西糜爛賴李元度力戰撫州支持危局次年臣丁憂回籍留彭玉麟李元度兩軍聽其饑困顛危蒙譏忍辱幾若避棄而不顧者此一疚也李元度下筆

干言條理周密本有兼人之才外而司道內而清要各職均可
勝任咸豐五年自請帶勇十年夏間臣又強之帶勇用遲其長
致令身名俱裂

文宗有李元度失軀可惜人才難得之歎皆臣不善器使之過
此又一疚也此二疚者臣累年以來每飯不忘茲因忝竊高爵
拜

恩懷舊慚感交并此外臣尚有抱愧之端江忠源之將才本可
大有爲於時人皆知長江水師創於微臣而不知其議發於江
忠源咸豐三年江忠源在江西圍城之中一面奏請設立江面
水師一面函請臣在湖南造船臣以無錢未遽造辦厥後江忠

源屢次催請救援臣以無船無兵不能應之逮劉長佑江忠濟馳援廬州臣亦不能以一兵相助致廬州淪陷良將不竟其用至今耿耿此亦一疚也原任甯池太廣道何桂珍以

上書房翰林出爲道員甫至姑埠和春派三百人檄令馳援廬江未及到防卽以救援不力奏參革職其事本極委屈厥後播遷楚皖之交帶團剿賊饑餓艱危歷人間未有之苦屢稟願隸臣部下一雪忠憤臣亦無以應其求而遂其志卒以事機不密爲叛人李兆受所戕天下冤之李兆受旋再降於滁州改名世忠近年歸臣節制臣因髮捻方熾苗禍又興不必更添兵端又察李世忠實無異志遂奏令解兵歸籍善全始終論

國家包容降將之道大體尙屬妥協論當時戕殺道員之慘百年猶有餘哀古之征伐爲匹夫匹婦復讎臣反不能爲良臣良友復讎何以對何桂珍於地下此又臣之一疚也咸豐六年臣被困於江西與湖南音問不通者八閱月軍心皇皇胡林翼奏派劉騰鴻普承堯吳坤珍與臣弟曾國華四人帶勇六千馳援江西苦戰兩月師抵瑞州從此兩湖始通文報江西始有轉機實惟劉騰鴻兵力最勁功績最偉次年臣丁憂回籍劉騰鴻與臣堅約諳請迅速回營得所依倚臣以陳情終制未還江西劉騰鴻因堅城不下餉項不繼諸事齟齬盼望臣往爲之主持而不可得抑鬱無聊終日逼城苦攻中砲而亡劉騰鴻忠勤堅卓

臣與駱秉章胡林翼福興等皆奏稱有名將之才乃該員以救臣而來臣反若委之而去不加護惜喪此烈士此又一疚也楚軍之興驍勇以塔齊布爲最雲南之畢金科次之二人皆能以匹馬穿出敵陣之背羣賊熟視而不敢逼六年二月臣部周鳳山樟樹鎮之敗惟畢金科一隊得完臣旋派令救援饒州畢金科長跪臣前稟稱孤軍千人不足以獨當一而願隨侍左右不欲遠離臣許以不久調回慰而遣之後在饒州屢次血戰以事機不順未及保獎又爲同事所排擠憤鬱飲泣七年正月戰死於景德鎮饒人憐之臣一言失信隕此長城嘗作一碑表其忠勇至今尙未刊立以猛將氣蓋一世旣不能善用以大顯其功

名而雲南梗阻萬里又不能寄金以優卹其父母此亦一疚也
臣忝任將帥以愛惜人才爲職而歷年屈抑人才實已不少謹
將私衷抱疚之端一一上陳李元度屢經臣處參劾未便再由
臣處保薦應如何酌量錄用之處出自

聖主鴻裁江忠源何桂珍劉騰鴻畢金科四人可否由臣奏請
加恩之處恭候

訓示奉

旨報可 沈葆楨遣顧雲彩敗賊於施村張岳齡敗賊於杉溪
左宗棠遣王開琳等敗賊於廣豐上饒二縣黃少春王德榜
敗賊於鉛山湖坊陳坊等處 時僞幼主洪福瑱僞祐王李連

繼竄至光澤瀘溪而丁太陽等首踞瑞金攻破民寨分犯興國之上下謝零都之仙霞觀髮捻大股由湖北麻城羅日轉趨安徽之英霍六安於是江右楚皖之間騷然矣 九月初八日公至金陵 十二日鮑超大捷於甯都州僞康王汪海洋自許灣敗後率悍黨數萬犯甯都知州郭毓龍等登陴固守超自池埠進援十一日賊分三路犯官軍營列隊山岡彌望無際超指揮諸將布置甫定賊拚死衝突我軍五路齊進敗其前隊譚勝達唐仁廉左右迎敵周有勝等擣其中堅盡毀吳口渡張連湖坑山港烏林壩等處賊壘甯都之圍始解 席寶田大捷於廣昌初僞王王洪仁玕等由新城敗遁寶田督軍晝夜窮追及之於

廣昌白水嶺賊進踞古嶺憑險堅拒我軍斬關而入賊自相踐
踏寶田率輕騎疾進生擒洪仁玕仁玕秀全弟也秀全族兄僞
卸王洪仁政及僞昭王黃文英皆被獲 沈葆楨遣韓進春克
零都縣會昌練勇克瑞金縣 左宗棠軍敗賊於雲際關賊自
陳坊敗後分兩股一趨雲際關一向大呂山洪福瑱率馬隊狂
竄宗棠部將魏喻義扼之於雲際關收降三千餘人福瑱越唐
坊竄入石城 時瑞金敗匪由廣東平遠鎮平大埔闖入閩境
陷武平縣張運蘭死之遂陷龍巖州而漳屬南靖等縣有土匪
勾結粵勇詐稱髮匪徧擾村堡賊由南靖犯漳州府陷之左宗
棠遣黃少春劉明珍由衢州取道浦城赴邵武接防騰出康國

器全軍進剿漳州劉典由建昌赴汀州高連陞由海道赴福州以保省城而賊另股由江西安遠長甯竄入廣東平遠縣知縣吳炳殺死之其竄南雄州者復回竄江西龍南和平龍川境內各縣皆嚴備賊不得逞乃竄入嘉應州二十五日沈葆楨遣席寶田追擊賊於石城僞幼主洪福瑱伏誅初福瑱自金陵竄出由廣德州逃往浙江復出竄安徽甯國績溪自浙江遂安遁入江西廣豐瀘溪我軍緊躡其後至廣昌石城賊酋斬馘殆盡游擊周家良獲之於石城荒谷中並獲僞忠王李秀成之子李其祥捷聞奉

旨洪福瑱卽在江西省城浚遲處死李其祥俟及歲時照例辦

理於是閩浙總督左宗棠

錫封一等伯爵江西巡撫沈葆楨

賞一等輕車都尉浙江提督鮑超

錫封一等子爵浙江布政使蔣益澧

賞騎都尉記名按察使席寶田

賞雲騎尉其餘出力人員論功給獎各有差

求闕齋弟子記卷九